



Stručna služba općinskog vijeća i općinskog načelnika

Broj: 01/1-02-2831/18  
Ilijaš, 27.12.2018. godine

**PRIJEDLOG**

**Z A P I S N I K**

sa 26. (dvadesetšeste) sjednice Općinskog vijeća Ilijaš, održane dana 27.12.2018. godine, sa početkom u 10:00h.

Dvadesetšestom sjednicom Općinskog vijeća Ilijaš predsjedavao je zamjenik predsjedavajućeg g-din Alen Hasković.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	<b>SDP</b>
15	ALAN ŠERAK
16	ELDAR ŠEHIĆ
17	MIRSAD OSMANOVIĆ
	<b>SBB-FAHRUDIN RADONČIĆ</b>
18	AKIF BEŠLIJA
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	EDHEM HASANOVIĆ
22	ASIM MUJIĆ
	<b>SAMOSTALNI VIJEĆNICI</b>
23	SEMIR DIZDAREVIĆ
24	BESIM GLJIVA
	<b>LDS</b>
25	MEHO DŽINDO

Prisutni gosti:

1. TV Vogošća
2. Radio Ilijaš-Aida Muratović
3. Mirnes Đozić – Info.net Ilijaš
4. Safet Gabeljić – predsjednik Savjeta MZ Podlugovi
5. Mehmed Smajlović – predsjednika savjeta MZ Mrakovo
6. Meho Tabaković – predsjednik Savjeta MZ Ljubina
7. Mirsad Hamzić – predsjednik Savjeta MZ Malešići
8. Mirsad Balta – predsjednik Savjeta MZ Kamenica
9. Elmin Brkić – predsjednik Savjeta MZ Luka
10. Samra Ramić – predstavnik OSCE-a
11. Namka Šuvalija – predstavnik Sarajevošuma
12. Meho Gljiva – Služba za društvene djelatnosti i poslove mjesnih zajednica
13. Volonteri: Ehlimana Fazlić, Irmela Hodžić i Senida Delić

Ostali prisutni:

1. Akif Fazlić – općinski načelnik
2. Meliha Avdibegović – pomoćnik načelnika
3. Sadeta Brkić – pomoćnik načelnika
4. Nijaz Spahić – pomoćnik načelnika
5. Zdravko Barić – pomoćnik načelnika
6. Aziz Fazlić – pomoćnik načelnika
7. Merima Osmanović – pomoćnik načelnika
8. Sanja Zagorac-Jozić – pomoćnik načelnika
9. Ilda Kahrman – sekretar OV-a Ilijaš
10. Muvedeta Fazlić – šef odsjeka za opću upravu
11. Nermina Lemezani - stručni saradnik za informacije
12. Enisa Mešetović - stručni saradnik za obrazovanje, pitanje mladih i NVO sektor
13. Đenan Suša – IT administrator
14. Maida Habibović – zapisničar.

ALEN HASKOVIĆ – zamjenik predsjedavajućeg

Konstatovao je da su prisutni novi vijećnici: Šeharzada Ćosić, Vehid Halilović i Eldar Šehić, te ih pozvao da polože zakletvu.

Nakon polaganja zakletve, otvorio je sjednicu i konstatovao da je prisutno 25 vijećnika, te da postoji kvorum za odlučivanje.

Pročitao je predloženi dnevni red i dao na razmatranje.

ALAN ŠERAK – vijećnik SDP-a

Predlažem da se tačka 3. Prijedlog Odluke o izboru predsjedavajućeg Općinskog vijeća Ilijaš povuče sa dnevnog reda iz razloga što ova Odluka koju smo dobili u materijalima je nepotpuna, a na stolovima nemamo neki drugi prijedlog Odluke, a trebali smo imati, a ono što je najvažnije u cijeloj ovoj priči jeste da mi nismo dobili mišljenje Komisije za statut i propise, a itekako nam treba. Znači, moj prijedlog je da se ova točka dnevnog reda povuče do slijedeće sjednice OV-a i da pribavimo sve ovo što treba da imamo za ovu tačku

dnevnog reda kako bismo mogli donijeti Odluku u skladu sa propisima.

AKIF FAZLIĆ – općinski načelnik

Predlažem dopunu dnevnog reda pod tačkom 7., a to je Odluka o pristupanju izradi Izmjena i dopuna Regulacionog plana “Željezara” Ilijaš – izgradnja objekta za izradu lakih metalnih konstrukcija.

ALEN HASKOVIĆ – zamjenik predsjedavajućeg

Kolega Šerak, kod prijedloga dnevnog reda imali smo Kolegij OV-a sa istim ovakvim sadržajem Odluke o izboru predsjedavajućeg Općinskog vijeća Ilijaš i ne vidim ništa sporno obzirom da je isti ovakav prijedlog bio i na Kolegiju OV-a i tada smo utvrdili dnevni red.

ALAN ŠERAK – vijećnik SDP-a

Zanima me da li je održana sjednica Komisije za statut i propise? Sekretar OV-a neka nam odgovori. Zašto nemamo njihovo mišljenje vezano za tačku pod rednim brojem 3?

ILDA KAHRIMAN – Sekretar Općinskog vijeća Ilijaš

Komisija za statut i propise nije imala primjedbi na pravni osnov i pravno-tehničku usklađenost.

ALAN ŠERAK – vijećnik SDP-a

Normalno da ne može imati kada ne zna ko će biti kandidat, jer radimo stvari ubrzano. Ne znam za što treba da glasam. Ovaj dnevni red ovako kako ste mi poslali pod tačkom 3. , da li mi trebamo izabrati komisiju koja će provesti izbore. Ako trebamo, zašto to ne stoji u dnevnom redu?

ALEN HASKOVIĆ – zamjenik predsjedavajućeg

To ćemo uraditi u sklopu tačke dnevnog reda.

ALAN ŠERAK – vijećnik SDP-a

To se moralo navesti u dnevnom redu i to se tako radi. I dalje insistiram da se tačka 3. povuče sa dnevnog reda.

ALEN HASKOVIĆ – zamjenik predsjedavajućeg (replika)

Vi nećete glasati za “praznu” Odluku, ovdje će biti ime osobe koju OV-e izabere za budućeg predsjedavajućeg OV-a. Komisija za izbor i imenovanje je zasjedala i u sklopu tačke 3. dnevnog reda, Komisija će nas izvjestiti o svom radu, o prijedlozima koji su pristigli. U sklopu ove tačke dnevnog reda Poslovnik o radu OV-e je predvidio da Vijeće izabere tri člana tj. Komisiju od tri člana (predsjednik i dva člana) iz reda vijećnika i ta Komisija će da vrši brojanje glasova, a ja ću da vas izvjestim o rezultatima glasanja. Tada ćete znati ime koje će stajati u ovoj Odluci i za to ćete glasati.

ALAN ŠERAK – vijećnik SDP-a (replika)

Kao prvo, nećeš nas ti predsjedavajući izvjestiti o rezultatima glasanja, nego taj ko bude provodio izbore. Valjda toliko znamo. Što se tiče imena kandidata, gdje su ti kandidati, jer ih ja ne vidim? Da li treba da nagađam ko je kandidat? Imena trebaju biti u materijalima koje sam dobio za današnju sjednicu, a ja to stvarno nemam. Ja imam samo Odluku sa praznom linijom gdje je trebalo biti upisano ime. Ozbiljan je stvar ko će voditi ovo Vijeće. Moramo zna s čime se igradmo, a s čime se ne igramo. Ko je taj ko treba da vodi Vijeće, a ko nije. Je li sve u skladu sa propisima ili nije, itd.?

Po meni, ovo je bolje povući sa dnevnog reda, pripremiti za narednu sjednicu i proceduralno uraditi kako treba.

ALEN HASKOVIĆ – zamjenik predsjedavajućeg

Član 158. Poslovnika Općinskog vijeća Ilijaš čini mi se da kaže da nakon što predsjedavajući objavi da je glasanje završeno, utvrđuju se i objavljuju rezultati glasanja.

MUHAMED HANDŽIĆ – vijećnik BPS-Sefer Halilović

Ja sam bio jedan od inicijatora da se danas provedu izbori za predsjedavajućeg OV-a i stojim i dalje iza toga. Međutim, upotpunosti se slažem sa Alanom da oni, kao prvo, nisu pripremljeni u skladu sa Izbornim zakonom, drugo, ja ne želim da glasam za nešto što ne vidim. Dalje, ne radi se o izbornoj komisiji o kojoj vi pričate predsjedavajući. Vi napominjete da se radi o verifikacionoj komisiji, oni samo prebrojavaju glasove. Međutim, ja želim da imam ispred sebe biografiju svakog kandidata. Niste bili nimalo korektni da pozovete sve političke subjekte koji participiraju o ovom Vijeću na dogovor, na razgovore vezano za izbor predsjedavajućeg OV-a. Vi ste to uradili na svoju ruku, donijeli ste prijedloge i ja neću dati glas nikome od koga ne vidim biografiju i popunjen obrazac pred izbore. Znači, onaj ko se kandidovao za vijećnike u ovom Vijeću želim vidjeti obrazac i da vidimo o čemu se radi. Prvo, ne želim da rušim Ustav BiH. Koliko vidim, imamo načelnika koji je iz reda Bošnjaka, a trebamo birati kandidata iz reda ostalih ili iz reda drugih naroda koji žive s nama u BiH, odnosno koji participiraju u ovom Vijeću. Mi takvih imamo, pretpostavljam da imamo, ali ja hoću da vidim na tom obrascu da li se on izjasnio kao Bošnjak, Bosanac, Srbin, Hrvat ili već kako se izjašnjavaju. To želim da vidim, a ne da glasam kao voštana figura, a vi verifikujete i utvrđujete stanje kakvo jeste, a sutra će me neko pozvati na odgovornost zašto sam dao podršku praznom aktu.

ALEN HASKOVIĆ – zamjenik predsjedavajućeg

Kolega, ja ne bih ulazio u raspravu sada po ovoj tački dnevnog reda. Hajde da usvojimo dnevni red, pa ćemo raspravljati kada dođe ta tačka dnevnog reda.

MUHAMED HANDŽIĆ – vijećnik BPS-Sefer Halilović

Kolega Haskoviću, cijenim da ste jako pametan čovjek i trebalo bi da znate o čemu ja pričam. Ne možete staviti taču na dnevni red ukoliko ona nije potpuna i nije pripremljena. Pripremite je pa ćemo je staviti na dnevni red. Za ovakav dnevni red ne želim glasati. Opet imamo lakrdiju. Znači stavljamo na dnevni red ono što mi želimo, a ne što treba i što je pripremljeno. Nisam ni ja vidio ovaj izvještaj Komisije za statut i propise. Govorim o čemu se radi. Sve smo pustili da ide šablonski, mora to proći. Ma ne mora ništa proći. Ako bude

potrebno bavićemo se i sudovima, tužbama, svim i svači da ne radimo kampanjski nego da se radi sistemski.

ALAN ŠERAK – vijećnik SDP-a

Zamoliti ću sekretara OV-a da nam pojasni šta će se desiti ako mi danas izabremo predsjedavajućeg i time povrijedimo odredbe Ustava BiH, odnosno Kantona Sarajevo, odnosno Statut Općine Ilijaš i ako se proglasi da je ne ustavna Odluka koju danas donesemo? Kakve posljedice će proizaći iz takve Odluke, to će trajati dok se apelacija ne završi? Da li svi akti koje donesemo nakon toga, su takođe ne ustavni ili jesu? Dakle, to je moje pitanje, a tiče se tačke 3.

ILDA KAHRIMAN – Sekretar Općinskog vijeća

Ja ne bih davala nikakve odgovore obzirom da ja nisam nadležna da tumačim akte koje ne donosim. Ja sam sekretar OV-a i pružam stručnu pomoć Vijeću, a OV-e koje donese Odluke ima Komisiju za statut i propise koja je nadležna da autentično tumači to.

ALAN ŠERAK – vijećnik SDP-a

Ono što me sad stvarno zanima, dakle vi ste stručna osoba koja treba da tumači određene stvari, ali ne iz vaše nadležnosti. Imamo Komisiju za statut i propise i ja hoću sada njih da pitam, ali ne znam kako da ih pitam. Nisu prisutni i šta da sada radim. Evo hoću da pitam Komisiju za statut i propise šta ćemo napraviti ukoliko usvojimo ovu Odluku koja je suprotna Ustavu FBiH-a.

ILDA KAHRIMAN – Sekretar Općinskog vijeća

Po Poslovniku Općinskog vijeća Ilijaš definisano je da se poziv i materijal za sjednicu dostavljaju najkasnije dva dana prije održavanja sjednice. Pismeno se obratite.

ALAN ŠERAK – vijećnik SDP-a

Je li? A danas ćemo izglasati neke stvari. Je li vam to procedura? Kolega Haskoviću, povucite tačku 3. sa dnevnog reda, nigdje nećemo zakasniti, a u međuvremenu da se posavjetujemo sa ljudima od struke, da vidimo šta nam je činiti. To je za dobrobit ove općine. Danas se usvaja Budžet i niz nekih drugih Odluka, a vi izvolite.

BESIM GLJIVA – samostalni vijećnik

Pokušat ću da budem potpuno realan. Izbor predsjedavajućeg OV-a je veoma bitna stvar i veoma je bitno ko je to lice i veoma su bitne procedure na koji način se bira. Ja sam već nekoliko puta učestvovao u tim procesima i činjenica je, pored moje dobre volje, da i ja ne znam ko je kandidat za predsjedavajućeg i još mi nije jasno na koji način ćemo birati. Obzirom da smo mi svi ovdje zajedno dvije godine i da zajedno radimo, kolege smo vijećnici, u dobrim smo odnosima, vlada manje-više nekakva harmonija i ponosan sam na to. Ako postoji kompromis, hajde da ga nađemo, da ne zaoštravamo situaciju. Da li je nama baš neophodno da danas izaberemo predsjedavajućeg OV-a? Je li problem da se to uradi za mjesec dana? Ako već postoje ove manjkavosti, da ne vodimo ovo u "lijevo" ili "desno" i da imamo cijele naredne dvije godine nekakve netrpeljivosti. Sve ovo govorim

dobronamjerno. Ako postoje bilo kakve manjkavosti i ako možemo to prevazići na korektan način, onda do naredne sjednice neke stvari samo nadopuniti, ne bitno o kome se radi. Ja bih predložio da u tom smjeru idemo. To je jedan dobronamjeran prijedlog, jer iz višegodišnjeg vijećničkog iskustva, ako ovo bude danas izglasano, to povlači za sobom neke narušene, pokvarene međuljudske odnose, a da ne pričamo široj političkoj situaciji koja utiče na lokalnu itd.

Ovo je dobronamjeran prijedlog i sugestija, a ja ću se lično izjasniti i ZA i PROTIV ako odlučite da ipak danas izaberemo predsjedavajućeg OV-a. Znači, ono što je moj konkretan prijedlog, ako se može jednim korektnim dogovorom i razgovorom dogovoriti, možda i pauzu napraviti, a ako zbog nekih drugih stvari ne moramo danas izabrati predsjedavajućeg, mjesec dana nam ne znači ništa.

SEMIR DIZDAREVIĆ – samostalni vijećnik

Upravo ovo što je kolega Besim rekao, možda je najbolje da napravimo pauzu da se konsultujemo obzirom da je situacija takva kakva jeste u cilju dobrih odnosa i da ne zaoštravamo situaciju koja nije sjajna.

ALEN HASKOVIĆ – zamjenik predsjedavajućeg

Na prošloj sjednici Vijeća smo imali određenu vrstu opaske zašto nismo na dnevni red stavili Odluku o izboru predsjedavajućeg OV-a. Tada je ta bila opaska i bez da smo razriješili predsjedavajućeg OV-a.

RASIM ŠEHIĆ – predsjednik Komisije za izbor i imenovanja

Obzirom da je Kolegij OV-a donio Zaključak da sekretar OV-a, kao osoba koja je zadužena za koordinaciju sa političkim partijama, pozove sve političke partije da dostave prijedloge za predsjedavajućeg OV-a i to je ispoštovano i ispoštovatni su rokovi. Ja predlažem pauzu deset minuta, obzirom da sekretar ima mogućnost da sačini ovaj prijedlog Oduke, da dopunimo imena i ako treba u koordinaciji sa šefovima klubova da nastavimo daljnji rad sjednice i da pristupimo usvajanju samog dnevnog reda.

MUHAMED HANDŽIĆ – vijećnik BPS-Sefer Halilović (replika)

Kad dođe do zida, prebacuje se loptica na sekretara, u ovom slučaju, sekretaricu. Mislim da je ona odgovorna osoba i da joj je bilo ko rekao da nas pozove, ona bi nas pozvala, ja tvrdim. Nije nas niko pozvao i vi opet pričate o tome kako ste rekli sekretaru da pozove političke subjekte koji participiraju u ovom Vijeću, Ja ne vjerujem da nas je iko obavijestio. Znači, nemojte se baviti tim. Dajte nam činjenice, dajte nam nešto na što jeste. Manite nam to “ja mislio”. Nema to i ovdje ne postoji “ja mislio”.

ALAN ŠERAK – vijećnik SDP-a (replika)

Ovo što je kolega Gljiva Besim rekao, on to zna, dugogodišnji je vijećnik i zna kako se to uvijek radilo. I kada želite nešto na “mišiće” provesti opet imate onu dovoljnu dozu korektnosti, a u skladu sa Statutom Općine Ilijaš gdje vam fino stoji u članu 47. da kod izbora predsjedavajućeg se obavezno vode međustranačke konsultacije. Uvijek je tako bilo, ali ovog puta to nije bilo. I sada se želi na “mišiće” izgurarati da to ide na dnevni red. Uredu, ovo što predlaže Rasim Šehić. Dostavite ta imena, ali ja opet tražim pravni osnov

za ta imena. Jel mi ne možemo sebi dozvoliti tu vrstu apsurdne situacije da izglasamo "ne dao Bog nešto" što nije u skladu sa Ustavom Federacije BiH. Pa kakvu to poruku mi želimo poslati odavde. Da ne govorim o pravnom vakumu koji će nakon toga nastati. To je posebna priča, a ja ću se pobrinuti za tu priču, neka vam bude jasno, itekako da hoću, a bitne se odluke danas usvajaju. Vodite računa o tim stvarima. Moj prijedlog je da date pauzu da se vi u SDA konsultujete. Uradite ono što treba. Povučete tačku do slijedećeg mjeseca, jer mi nećemo ništa izgubiti, da uradite proceduralno ispravno i da idući mjesec izglasamo predsjedavajućeg OV-a. To je put i procedura da zadovoljimo sve, ako želite, a ako ne želite, "gurajte na mišiće" i mi ćemo ići "mišićima".

RASIM ŠEHIĆ – predsjednik Komisije za izbor i imenovanja (replika)

Ne znam da li sam dobro shvaće. I ostale kolege su članovi Kolegija OV-a i Kolegij je donio Zaključak takav kakav je. Znači, vijećnici nisu odgovorni za to da li je bila koordinacija ili nije. Ta koordinacija nigdje ne stoji, da su prekršeni određeni propisi i pravila. To automatski, dostavljanjem kandidata, svi su bili upoznati i svaki vijećnik ima pravo, ako treba i samostalno da se kandiduje. Ono što sad tražim i što poslovnički je omogućeno, je da napravite pauzu, da izvršimo konsultacije međusobno, a ovo što sam predložio i da sekretar dopuni prijedlog Odluke o izboru predsjedavajućeg OV-a, jer to je tehnička stvar. Svi mi znamo koja su to imena i samim tim možemo usvojiti dnevni red, diskutovati, pa ako bilo ko od kandidata ima većinu, ima nema, idemo dalje. Dakle, predsjedavajući, ako postoji replika, poslije replika tražim pauzu.

ALAN ŠERAK – vijećnik SDP-a (replika)

Obzirom da ćete ići u tom pravcu ja insistiram na pravnom tumačenju prijedloga Odluke od strane Komisije za statut i propise.

Uslijedila je pauza od 10:40-11:20 h.

Nakon pauze, Alen Hasković - zamjenik predsjedavajućeg dao je na glasanje zapisnik sa 25. sjednice OV-a.

Primjedbi na zapisnik nije bilo, pa je OV-e jednoglasno usvojilo zapisnik sa 25. sjednice OV-a.

Na stolovima imate Izvod iz zapisnika Komisije za izbor i imenovanja u kojem stoje imena kandidata za predsjedavajućeg OV-a Ilijaš. Smatramo da je time tačka dnevnog reda potpuna.

ALAN ŠERAK – vijećnik SDP-a

Ovo je izvod iz zapisnika i drago mi je da sam isti dobio i ovdje ćete vidjeti da sam se ja sinoć pozivao na Zakone i druge propise koji važe u BiH. Međutim, meni ne treba Izvod iz zapisnika Komisije. Meni treba prijedlog Odluke. To su dvije dijametralno suprotne stvari. Dakle, ja hoću ovdje da vidim imena potpisana od strane predsjednika Komisije, kako je to Komisija glasala i da to bude sastavni dio prijedloga Odluke. Da li je to glasački listić, evo vi sjedite malo pa to razmotrite. Izvod iz zapisnika meni, kao vijećniku, ne treba. Ovo je nešto što se tiče mene da li je na Komisiji urađeno kako treba. Dakle, meni treba prijedlog Odluke, a ne Izvod iz zapisnika.

ALEN HASKOVIĆ – zamjenik predsjedavajućeg

Ali jasno se vidi iz tog zapisnika ko su prijedlozi za izbor predsjedavajućeg OV-a.

ALAN ŠERAK – vijećnik SDP-a

Kolega Haskoviću, dugo vodiš ovo i što je rekao uvaženi kolega Handžić, smatram da si korektan i da si nadaren. Međutim, ne možete tvrditi da je Izvod iz zapisnika isto što i prijedlog Odluke. Izvod iz zapisnika je jedno, a prijedlog Odluke je drugo. Prijedlog Odluke ima svoju pravnu snagu, a Izvod iz zapisnika ima nešto drugo. Dakle, nama ovdje treba prijedlog Odluke, a ne izvod iz zapisnika.

RASIM ŠEHIĆ – predsjednik Komisije za izbor i imenovanja

Samo sam htio naglasiti jednu tehničku stvar koju je možda Kolegij propustio da bi ovo bilo upotpunosti, jeste da se Izvod zove izvještaj i time bi ovo bilo upotpunjeno iz razloga što Komisija upravo i donosi izvještaj i to jeste njena nadležnost da podnese izvještaj.

ALAN ŠERAK – vijećnik SDP-a (replika)

Dakle, Izvještaj stoji, ali se Izvještaj dostavlja Kolegiju, Kolegij onda pravi prijedlog Odluke zajedno sa sekretarom, zatim Kolegij utvrđuje dnevni red za sjednicu OV-a i onda se to zajedno sa materijalima dostavlja vijećnicima. To je procedura, je li tako?

ALEN HASKOVIĆ – zamjenik predsjedavajućeg

Što to niste rekli na Kolegiju koji je održan prije sedam dana?

ALAN ŠERAK – vijećnik SDP-a

Vaš je problem što ste ušli u ovu priču poslije Kolegija. Do Kolegija ste ovo sve trebali završiti i onda na kraju sazvati Kolegij i ovo sve pravno proceduralno uraditi kako treba i onda dostaviti vijećnicima. Tako vam i Poslovnik nalaže. Samo treba čitati.

ALEN HASKOVIĆ – zamjenik predsjedavajućeg

Bili ste na Kolegiju kada smo donijeli Zaključak da sve političke partije do utorka do 16:00h dostave svoje prijedloge za predsjedavajućeg OV-a.

SEMIR DIZDAREVIĆ – samostalni vijećnik

Kad smo kod tog poziva. Ja sam prije dva dana u podne dobio poziv da dostavim prijedlog za predsjedavajućeg do 16:00h. Nezavisan sam, Bošnjak sam i shvatam da ne mogu biti kandidat, ali stalno se poziva na Kolegij. Vi ovdje imate osam vijećnika koji nemaju mogućnost učestvovanja na Kolegiju. Znači, vi ovih osam vijećnika nipodaštavate ovdje. Dajte sazovite konsultacije. Nije problem, vi imate većinu, izglasat ćemo to, dostavit ćemo i mi prijedloge, ali poštuju nas prvo kao komšije, kao ljude, kao vijećnike, kao kako god hoćete. Trećinu Vijeća ovdje niko ništa nije pitao.



RASIM ŠEHIĆ – predsjednik Komisije za izbor i imenovanja

U određenoj mjeri se mogu složiti sa ovim što kaže kolega Semir Dizdarević, ali zna se ko je član Kolegija. Znači, Klubovi koji participiraju i niko ne spori da preostali dio vijećnika formiraju Klub i da participiraju u Kolegiju. Još jedna bitna stvar što svi izostavljamo ili ne želimo da kažemo. Starije kolege to mogu potvrditi, a to je da nas niko ne spriječava Poslovnički da sada na samoj sjednici imamo prijedlog. Bilo koji vijećnik sada može da delegira kandidata za predsjedavajućeg OV-a. To niko ne može osporiti. Komisija za izbor imenovanja bi nakon toga imala obavezu da razmotri i taj prijedlog. Znači, čak i u tom slučaju, a kamoli u slučaju gdje smo imali i Kolegij i gdje su svi obavješteni.

ALAN ŠERAK – vijećnik SDP-a (replika)

Replika Rasimu Šehiću. Statutarna je obaveza da se kod izbora predsjedavajućeg obaviti međustranačke konsultacije. To je ono o čemu je Semir Dizdarević govorio. Trebali smo sve parlamentarne grupe sazvati, sjesti i obaviti konsultacije. Mi to nismo uradili. Znači zašto to nismo uradili? Zato što taj proces nije vodio Alan Šerak. Da ga je vodio Alan Šerak on bi tako uradio. Ja sam to naučio. To je trebao da uradi predsjedavajući OV-a kojeg nema, ali u ovom slučaju ga mijenja zamjenik. S druge strane, ovo što se pozivamo na Zakone, Ustave i sve ostalo o čemu mi ovdje pričamo, pa upravo sam vam sinoć govorio da mi ne možemo sa ovom tačkom dnevnog reda danas ići jer nismo napravili Odluku u skladu sa Ustavom FBiH, Kantona i svega ostalog. Ustavna odredba je ustavna odredba i tamo nešto piše. Ako mi kao izabrani zvaničnici ovog nivoa želimo da derogiramo Ustav FBiH, pa kakvu to poruku mi želimo da pošaljemo odavde. Ako je Ustav nešto tretirao, onda je naše da to poštujemo i da se pridržavamo toga. Pozivate se na Poslovnik, a on je podzakonski akt. Ne može podzakonski akt biti viši od Ustava FBiH i vi to mora da znate. Poslovnik o radu definiše odnose unutar Vijeća i to je to, a Zakoni tretiraju određene oblasti. Pa valjda smo to naučili za ovih 8-10 godina. Ne znam koliko si vijećnik, ali trebao si do sada to naučiti.

RASIM ŠEHIĆ – predsjednik Komisije za izbor i imenovanja (replika)

Ne smatram ni kolegu Alana da je neozbiljan obzirom da je prisustvovao Kolegiju gdje smo mi upravo kao Kolegij usvojili Zaključak da u skladu sa Statutom i Poslovnikom izvrše međustranačke konsultacije itd. Ja ne mogu nikoga natjerati hoće li vršiti međustranačke konsultacije, gdje, kako. Mi smo upotpunosti proceduru ispoštovali, zadovoljili. Ako imate da kažete gdje je Poslovnik prekršen koji upravo definiše ove stvari, recite nam. Ja predlažem da se pristupi usvajanju dnevnog reda.

MUHAMED HANDŽIĆ – vijećnik BPS-Sefer Halilović

Lijepo je slušati Rasima Šehića kada priča o Statutu, Poslovniku, ali rijetko kad pričaš o tome kolega Šehiću, osim kada budeš "dotjeran do duvara". Evo dobili smo Izvještaj ove Komisije i on je opet nepotpun. Ja cijenim da mi ovaj dnevni red možemo usvojiti i bez ovog Izvještaja, ali kada dođemo do tačke 3. šta onda? Onda će nam biti potrebno niz akata. Između ostalog, kompletan ovaj Izvještaj i ove procedure nisu provedene u skladu sa Statutom i Poslovnikom kako vi govorite. Evo jedna napomena, opaska od Akifa Bešlije da niste dostavili nacionalnu strukturu kandidata koji se biraju.

Vidite kako se ponašate. Niste ništa obavezni i vi ništa nikome ne dugujete, vi krojite Zakon, krojite Statut i krojite odluke. Vi sve podzakonske akte donosite jednoglasno, mi

vama nismo potrebni – nas osam koliko nas ima, vi ćete to sve sami uraditi. Znate šta, vi ste veliki i vi sve to znate i umijete. E vidite da ne umijete. Budite sigurni, ne budu li provedene sve ove procedure, ja sam na čelu tima koji će voditi sve postupke protiv nezakonito odrađenih radnji ovdje. To vam sada kažem javno da svi znate. To je zato što se ponašate indolentno i ne korektno prema nama (osam vijećnika) koliko nas ima u ovoj manjini. Znači, što se mene tiče, glasat ću za dnevni red, ali kada se dođe do tačke 3. nema šanse da se ne provedu sve procedure, pa da onda imamo kompletan prijedlog i sve ono što je neophodno uz prijedlog, odnosno Odluku. Mi smo je ovdje dobili u nekoj formi gdje se ne vidi ništa i vi ćete staviti tu ime i potpisat će se predsjedavajući, odnosno zamjenik predsjedavajućeg Alen Hasković. Budite sigurni kolega Haskoviću da se i za to odgovara i na kraju krajeva ja vam savjetujem da to ne potpisujete.

ALAN ŠERAK – vijećnik SDP-a

Dakle, sugerisao sam vam na početku sjednicu, a to ću isto ponoviti. Više kolega je isto reklo. Po meni, predlažem da tačku 3. povučemo sa dnevnog reda, da sačekamo mjesec dana, da zadovoljimo sve ovo što smo maloprije svi diskutovali i rekli i da za mjesec dana dođete i izglasate onako kako ste izrežirali. Ali morate voditi računa o proceduri. Ja ne mogu na vas uticati da li ćete glasati ovako ili onako, ali procedure morate poštovati. Prema tome, ako ćete me poslušati, povući ćete tačku 3. sa dnevnog reda, a ako nećete idite sa ovim dnevnim redom, ja za takav neću glasati, ali na trećoj tački dnevnog reda ću se voditi ozbiljna rasprava.

Diskutanata više nije bilo, pa je Općinsko vijeće većinom glasova usvojilo slijedeći

### **DNEVNI RED**

1. Vijećnička pitanja i inicijative
2. Izvještaj o realizaciji zaključaka sa 25. sjednice
3. Prijedlog Odluke o izboru predsjedavajućeg Općinskog vijeća Ilijaš
4. Prijedlog Programa rada Općinskog vijeća Ilijaš za 2019. godinu
5. Prijedlog Budžeta općine Ilijaš za 2019. godinu
6. Prijedlog Odluke o izvršavanju Budžeta općine Ilijaš za 2019. godinu
7. Prijedlog Odluke o pristupanju izradi Izmjena i dopuna Regulacionog plana "Željezara" Ilijaš – izgradnja objekta za izradu lakih metalnih konstrukcija
8. Prijedlog Odluke o davanju mišljenja na Godišnji plan realizacije šumskoprivredne osnove
9. Prijedlog Odluke o ustupanju na korištenje infrastrukturnih objekata: Antenski stub i kućica na lokaciji Karašnica, Javnoj ustanovi "Kulturno-sportski centar i Radio Ilijaš"
10. Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br.325/3)
11. Prijedlog Odluke o kupovini nekretnina (k.č.br.2405/2)
12. Prijedlog Odluke o povjeravanju vršenja poslova Pravobranilaštva Kantona Sarajevo za 2019. godinu
13. Informacija Službe civilne zaštite o protivminskim akcijama i mjerama zaštite i spašavanja za 2018. godinu.

AD-1  
Vijećnička pitanja i inicijative

ALMIR ŠPIODIĆ – vijećnik BPS-Sefer Halilović

Inicijative:

1. Pokrećem inicijativu da se Fahrudin Muminoviću dodjeli plac općinske zemlje u gradskoj zoni u Ilijašu za izgradnju stambenog objekta.  
Fahrudin Miminović je dječak koji se sa 7 godina preživio strijeljanje 1995. godine nakon pada Srebrenice. Fahrudin je bio zaštićeni svjedok na međunarodnom sudu u Hagu gdje je dokazano da je vojska i MUP BH entiteta Srpska izvršila genocid nad Bošnjacima zaštićene zone Srebrenica.  
Zasigurno je i svjedočenje Fahrudina doprinijelo dokazivanju istine, jer je on živi dokaz egzodusa uništavanja sve što je Bošnjačko na prostorima Istočne Bosne gdje se nije gledalo da li si vojnik, starac ili dijete. Fahrudin je naš heroj za koga sistem i država nije imala dovoljno sluha. Nek se stide oni koji su znali za njegovo stanje i nisu poduzeli ništa da mu obezbjede ugodniji i ljepši život. Na osnovu priloga Federalne televizije i Face TV vidjeli smo stanje u kojem je odrastao ovaj skromni mladić. Nakon objavljene priče na Face TV pokrenuta je akcija prikupljanja sredstava za Fahrudina i to ne od strane sistema i države, već od naše čestite dijaspore, koji su za vrlo kratko vrijeme skupili preko 200.000,00 dolara za našeg Fahrudina.

Na osnovu ove inicijative, a shodno Pravilniku Općinskog vijeća predlažem da Vijeće donese slijedeći

**ZAKLJUČAK**

Zadužuje se kabinet načelnika da obavijesti Fahrudina Muminovića da općina Ilijaš želi da dodjeli plac njemu i njegovoj sestri za izgradnju kuće. Ukoliko bude zainteresovan da želi živjeti u našoj općini, odmah pokrenuti zakonsku proceduru da se na narednoj sjednici Općinskog vijeća donese Odluka o dodjeljivanju zemljišta u trajno vlasništvo Fahrudina Muminovića.

2. Pokrećem inicijativu, u ime građana Vratuše – naselje Doci, prema Elektro distribuciji Sarajevo da preduzme konkretne aktivnosti kako bi se povećao napon na elektro distributivnoj mreži u pomenutom naselju.

Obrazloženje: U posljednje vrijeme građani pomenutih naselja, kao krajnji korisnici usluga Elektro distribucije, imaju problema s radom kućanskih aparata zbog slabog napona koji u nekim domaćinstvima pada ispod 190V u vremenu kada je jeftina tarifa struje. U pitanju je naselje koje ima preko 80 novoizgrađenih objekata i svi su potpisali ugovor sa Elektro distribucijom Sarajevo u kojem se definisalo koliki napon će se isporučivati građanima za domaćinstva kao krajnjim korisnicima.

Molim vas da poduzmete hitno mjere kako bi se građanima koji uredno plaćaju struju isporučivao napon koji je predviđen Ugovorom.

MUHAMED HANDŽIĆ – vijećnik BPS-Sefer Halilović

Inicijativa:

1. Pokrećem inicijativu da se u Ilijašu otvori centar za pružanje komunalnih usluga

građanima naše općine.

Obrazloženje: Naime, građani naše općine su jedini u Kantonu Sarajevo koji nemaju mogućnost da svoje račune, koji im svakog mjeseca stižu – plate dostavljačima navedenih usluga, bez određenog iznosa poštarine koja u prosjeku iznosi od 5 do 10 KM po domaćinstvu. U tom smislu molim načelnika i nadležnu općinsku službu da iznađu mogućnost otvaranja ovog centra, a po ugledu na općinu Vogošća.

Pitanje:

Postavljam pitanje ko će građanima Ilijaša platiti nadoknadu štete za povrede koje eventualno nastanu usljed pada na zaleđenoj pješačkoj zoni ili trotoaru općine Ilijaš?

Obrazloženje: Svjedoci smo činjenice neočišćenih trotoara poslije prvog snijega na ulicama centralnog područja naše općine. Postavlja se pitanje ko je odgovoran za takvo stanje, da li općine ili izvođači radova sa kojim općina Ilijaš ima Ugovor (ako ga ima) za zimsko održavanje, te ko je taj na čiju adresu treba uputiti tužbu za slučaj eventualnih povreda građana?

Također napominjem da su samo prije 5-6 godina naši trotoari u zimskom periodu bili čistiji i najsigurniji u Kantonu Sarajevo, ali u to vrijeme održavanje je vršeno od strane radnika KJKP RAD kojim je rukovodio g.din Adem Šerak.

Želim da dobijem odgovor i da napomenem da na moja pitanja rijetko kad i službe odgovoraju, a rijetko kad i šalju moja pitanja prema većim nivoima vlasti. Ne znam da li su moja pitanja ne ozbiljna pa to radite ili ima neki drugi razlog, ali biće red da pokrenemo i postupke prema vama koji imate obavezu da mi odgovorite ma kakvo pitanje bilo ako nije provokativno.

ALAN ŠERAK – vijećnik SDP-a

Samo da nadopunim što se tiče zimske službe. Ja uistinu ne znam po programu šta smo to ugovorili sa izvođačem radova, a tiče se održavanja pločnika tj. trotoara – kojih ulica. Svjedoci smo bili da u ul.Omladinska snijeg se sa trotoara nije očistio deset dana nakon padanja snijega, odnosno kada je isti stao. Deset dana, djeca koja idu na autobusku stanicu su morala ići ulicom. Zimska služba nam je postala katastrofa. Prvi snijeg i odmah prvi problemi. Ne znam više koliko godina unazad se mi bavimo ovom tematikom. Načelniče ne valja ti nadzor koji ne radi svoj posao onako kako bi trebao da radi. Dakle, po pitanju zimske službe, ja prvi kao Ilijašanin, nemam ništa protiv da to rade firme koje jesu iz Ilijaša. To je normalno i ja bi im dodjeljivao posao, ali to ne znači da se oni mogu ponašati onako kako se ponašaju trenutno. Ljudi ne rade bukvalno ništa. Ledena kora nam bila na asfaltu dvije sedmice nakon padanja snijega i svi smo svjedoci toga. Imali smo niz padanja pješaka po cesti, po trotoaru. Staza pored džamije – led. Oni nisu ništa uradili po pitanju spriječavanja poledice. To je suština i to je ono što naša djeca koriste. Tu su i osnovna i srednja škola, svi hodaju i koriste taj putni pravac. Prema tome, zamolit ću općinskog načelnika da itekao povede računa i ozbiljno porazgovara sa svojim nadzorom, jer ovo stanje kakvo trenutno imamo, a tiče se održavanja cesta, puteva i trotoara u zimskim uslovima, je uistinu katastrofa. Za mene lično, ovo je ne prihvatljivo. Zimsko održavanje mi puno platimo i taj neko ima da uradi ono što je navedeno u Ugovoru. Toliko o zimskoj službi i nadam se da ubuduće neću morati oko tih stvari pričati.

Ono na što bih želio skrenuti pažnju, jeste zloupotreba pečata ove institucije koja se zove

Općina Ilijaš. Mi, kao Kolegij OV-a, smo dali rok političkim partijama i subjektima koji gravitiraju u Općinskom vijeću Ilijaš da juče do 16:00 h dostave svoje prijedloge za predsjedavajućeg Općinskog vijeća Ilijaš. U utorak u 16:00 h sam provjerio pristigle prijedloge. Dostavio LDS i dostavio SDP-e. SDA nije dostavila svoj prijedlog. Juče sam bio na Komisiji za izbor i imenovanje i zatekao uredno protokolisan prijedlog SDA i navedeno da je predato u vremenski zadatom roku. Dakle, ovo su ozbiljne stvari. S tim stvarima se ne smije igrati. Zloupotreba pečata klasična, samo da bi ste vi zadovoljili formu, jer ste zakazali sastanak u utorak naveče, ali ste to trebali uraditi ranije. Sada sam ovo rekao i više mi ne pada na pamet, ali ukoliko se isto desi ja ću znati odgovoriti u pravom smislu.

Što se tiče odgovora na pitanja sa prošle sjednice OV-a, nažalost nisam bio u prilici da prisustvujem istoj, a tiče se Osnovnih škola Srednje, Podlugovi i Stari Ilijaš i ono što su oni uradili u toku predizborne kampanje davajući svoj prostor političkom subjektu SDA da u istim održava predizborne skupove. O ovome više takođe neću govoriti, jer vi nemate nekih dodirnih tačaka, ali ćemo sve dokumentovati, postoje slike, hvalili ste se tim skupovima i sve ćemo predati nadležnoj inspekciji, pa neka gospoda koja je onako sramno odgovorila, a biću grub pa ću reći, "slagala", da nisu održavani predizborni skupovi u njihovim prostorijama, nek se pravdaju kod inspekcije. Sve dokumentovano, sve zastave, kandidati, stoje tu, u fiskulturnoj sali OŠ Podlugovi, u Područnoj školi Dragoradi i javna tribina gdje je uvažena prva hanuma bila i držala govor u OŠ Stari Ilijaš. Sve imamo crno na bijelo, a oni nek se izjasne o tome kasnije.

ALMA OMEROVIĆ – vijećnica SDA

Inicijativa:

Pokrećem inicijativu da se svim drugim predstavnicima sredstava informisanja, izuzev Radio Ilijaša i drugih ovlaštenih predstavnika Općine Ilijaš, odnosno predstavnika sa kojima Općina Ilijaš ima zaključen ugovor da prate sjednice Općinskog vijeća Ilijaš, prilikom prijave za medijsko praćenje sjednica Općinskog vijeća Ilijaš, traži da dostave i dokaz o svojoj registraciji od nadležnih ustanova, kako bi isti mogli pratiti sjednice OV-a. U suprotnom, zahtjevam da se licima koja ne posjeduju dozvolu zabrani praćenje sjednica Općinskog vijeća Ilijaš.

HALID DIZDAREVIĆ – vijećnik SDA

Vezano za zaključak Almira Špiodića, želim reći da u ovoj sali nema niko ko ne želi pomoći ovom momku. Međutim, želio bih znati pravno na koji način se mi možemo izjasniti za dodjelu ovog zemljišta. Možda neko iz nadležne službe da nam kaže šta ćemo uraditi po ovom pitanju, kada je u pitanju Budžet i ostalo i način na koji se može pomoći.

AKIF FAZLIĆ – općinski načelnik

Kada je u pitanju prijedlog Zaključka, podržavam inicijativu u potpunosti, ali ne podržavam da donesemo eksplicitan zaključak u kome se nalaže da dodijelimo zemljište. Zemljište se ne može dodijeliti po važećim zakonskim procedurama. Nemojte da prije toga obavještavamo čovjeka dok ne nađemo način kako možemo izregulisati pitanje dobijanja neke lokacije i sa imovinskog aspekta i sa aspekta Regulacionih planova. Postavite tu inicijativu i zadužite nas da radimo na tome i obavijestit ćemo vas o tome. Nemojte donositi zaključak, jer dodjele zemljišta nema.

ALMIR ŠPIODIĆ – vijećnik BPS-Sefer Halilović

Ja bih volio da ovo ide kao Zaključak, s tim da ga možemo korigovati iz razloga što je u posljednoj emisiji Fahrudin izjavio da bi volio da lokacija bude bilo gdje, osim na toj gdje je preživio strijeljanje. Smatrao sam da bi to mogao biti Ilijaš koji je pružio priliku i ljudi su sa tih područja vidjeli općinu Ilijaš kao svoj grad i svoje mjesto i doselili se ovdje. Međutim, mislim da i ovdje ima ljudi koji bi Fahrudina najbolje razumjeli i koji su prošli sličan ili isti egzodus. Smatram da bi trebali hitno reagovati iz razloga da se ne bi desilo da neko prije nas da ili dodjeli zemlju Fahrudinu. Znamo da je pokrenuta akcija i traje do Nove Godine i ljudi su skupili preko 200.000,00 dolara koji žele da investiraju da naprave kuću za Fahrudina. Naše je samo da vidimo gdje imamo tu lokaciju, a kroz Regulacione planove smo vidjeli da ima lokacija i zakonska procedura da se provede da vidimo kako možemo dodjeliti to zemljište. Ovo bi bio jedan dobar gest Općine Ilijaš i nas kao Vijeća. Znači, da ovo bude Odluka svih nas.

ALAN ŠERAK – vijećnik SDP-a

Korektan je prijedlog i svaka ti čast Špiodiću što si se sjetio ovoga. Mislim da nema niko ovdje ko bi glasao protiv toga. Ja sam prvi sa dvije ruke ZA. Međutim, mislim da Zakon, ovo što je načelnik govorio, a bilo je prije da se bez naknade zemljište može davati samo za vojne i komunalne objekte. Možda bi bilo najbolje da ovo ide kao inicijativa, a na idućoj sjednici Vijeća usvojiti zaključak. Ostalo je zabilježeno da smo mi krenuli u ovu priču, a da se do toga nadležne općinske službe između sebe dogovore kako i na koji način to provesti.

HALID DIZDAREVIĆ – vijećnik SDA

Otpribliže isto rečeno i smatram da ovu inicijativu treba pretvoriti u Zaključak kojim se zadužuje općinski načelnik zajedno sa nadležnim službama da iznađu način i zakonsko uporište kako pomoći Fahrudinu Muminoviću.

RASIM ŠEHIĆ – vijećnik SDA

Apsolutno podržavam sve. Ovdje treba zadužiti službe i prije svega, ovo što rekoše kolege, a i gledajući i emisiju, obzirom da se i Fahrudin izjasnio prevashodno i za Sarajevo, treba zadužiti službu koja će ga kontaktirati i to da bude prvi korak da li je zainteresovan i je li to pravno moguće. Mi ćemo apsolutno svi, kao što kolega Alan kaže, podržati ovo.

AKIF FAZLIĆ – općinski načelnik

Ja sam upravo htio predložiti ovako kako je vijećnik Halid Dizdarević formulisao. Dakle, da se zaduži općinski načelnik da pripremi prijedlog ili varijante rješenja kako bi ovu inicijativu proveli u djelo.

ALMIR ŠPIODIĆ – vijećnik BPS-Sefer Halilović

Hvala vam na ispravci Zaključka i što ste mi pomogli da napravimo jedan dobar Zaključak i upotpunosti se slažem sa načelnikom i Halidom i mislim da bi trebali kontaktirati Fahrudina da vidimo da li on želi ovdje lokaciju.

Dakle, što prije treba kontaktirati Fahrudina.

ALEN HASKOVIĆ – zamjenik predsjedavajućeg

Pročitao je predloženi zaključak.

Općinsko vijeće je jednoglasno donijelo slijedeći

#### ZAKLJUČAK

Zadužuje se općinski načelnik Općine Ilijaš i nadležne općinske službe da u narednom periodu iznađu način, odnosno zakonsko uporište, te pripreme prijedlog rješenja kojim će se regulisati pitanje dodjele lokacije Fahrudin Muminoviću za izgradnju stambenog objekta.

#### AD-2

Izveštaj o realizaciji zaključaka sa 25. sjednice

Diskutanata po ovoj tački dnevnog reda, pa je Općinsko vijeće jednoglasno usvojilo

Izveštaj o realizaciji zaključaka sa 25. sjednice

#### AD-3

Prijedlog Odluke o izboru predsjedavajućeg Općinskog vijeća Ilijaš

RASIM ŠEHIĆ – predsjednik Komisije za izbor i imenovanja

Kao što već imate na stolu materijale dostavljene od strane sekretara OV-a, ovaj Izvod iz zapisnika je ustvari i Izveštaj koji je dužan predsjednik Komisije za izbor i imenovanja da podnese Općinskom vijeću. Znači, to je bila naša osma sjednica koja se odnosila na izbor predsjedavajućeg OV-a. Svi članovi Komisije su bili prisutni. Sve je u zapisniku navedeno, a ono što ću vas izvijestiti jeste da smo mi kao Komisija zaprimili tri prijedloga za predsjedavajućeg Općinskog vijeća. Jedan od prijedloga jeste od strane LDS-a da se predloži najstariji vijećnik u mandatnom periodu 2016.-2020. godina, te je utvrđeno da je to vijećnik Meho Džindo, drugi prijedlog je od strane SDP-a koji je predložio vijećnika Mirsada Osmanovića i treći prijedlog je od strane SDA koja je predložila vijećnicu Almu Omerović. Komisija se sa izjasnila sa četiri glasa ZA, uz zaključak Akifa Bešlije koji je izrazio sumnju, odnosno nesigurnost po pitanju nacionalne strukture predloženih kandidata da li je ona ovdje trebala biti naglašena ili ne. Kolega Alan Šerak se izuzeo iz glasanja kako sam shvatio iz razloga što predloženi kandidati nisu u skladu sa Ustavom, Zakonom, Statutom i Poslovníkom, a prije svega mislim po pitanju nacionalnog konsenzusa, odnosno zastupljenosti. Komisija je konstatovala, po pitanju same dostave materijala, da su bili blagovremeni i da du prijave bile uredne i glasali su tako kako su glasali. Ja mogu konstatovati da su ispunjeni svi uslovi što se tiče Komisije i mogu dati predsjedavajućem da vodi sjednicu u cilju izbora kandidata i dajem na dalje postupanje u skladu sa Poslovníkom.

ALAN ŠERAK – vijećnik SDP-a

Ja imam niz pitanja za kolegu Rasima Šehića. On je ovo malo upakovao, tako da treba da nam to bolje predstavi nego što to u biti jeste. Ali prije samih pitanja, ispred KV SDP-a tražim pauzu od 30 minuta da bi obavio unutarstranačke konsultacije sa ostalim.

ALEN HASKOVIĆ – zamjenik predsjedavajućeg

Uslijedila je i pauza za ručak (od 12:00-13:45h).

Nakon pauze, zamjenik predsjedavajućeg je naglasio da je uvodno izlaganje i obrazloženje dao Rasim Šehić – predsjednik Komisije za izbor i imenovanja. Pročitao je kandidate, raspravu smo otvorili, dali smo pauzu koju je tražio KV SDP-a radi unutarstranačkih konsultacija. Pitao je da li se neko javlja za riječ ili da se izabere Komisija koja će obaviti proceduru za izbor predsjedavajućeg OV-a.

ALAN ŠERAK – vijećnik SDP-a

Ne znam kako ćemo izabrati Komisiju kada to nemamo pod tačkom dnevnog reda, ali to ćete predsjedavajući kasnije obrazložiti. Dakle, cijenim ovo što je predsjednik Komisije za izbor i imenovanje iznio, međutim isti je trebao napomenuti da sam se ja zalagao na istoj da prijedlog Odluke koji mi pravimo mora biti ustavan. Nažalost, mi ni smo imali tu informaciju i ja sam onda predložio konstruktivan prijedlog da se ovo obustavi, a to predlažem i cijeli današnji dan na način da pribavimo sve ono što trebamo pribaviti za prijedlog Odluke, ali predsjednik Komisije se nije postarao za to, a što je bio dužan uz pomoć službe koja mu stoji na raspolaganju, da nam pribavi nacionalni identitet svakog od predloženih kandidata kako mi ne bi došli u situaciju da nešto izglasamo što je u suprotnosti sa Ustavom FBiH. Svi smo mi ovdje dali zakletvu o prihvatanju mandata, nove kolege to učinile na početku ove današnje sjednice i svi smo čuli da ćemo poštovati Ustav FBiH, Kantona, Zakone, propise i sve ostalo i sada se trebamo dovesti u situaciju da izglasamo nešto što nije u skladu sa Ustavom, a u samoj preambuli ove Odluke pozivate se na član 47. Statuta Općine Ilijaš i zamolit ću sekretara OV-a da pročita ovaj član.

ILDA KAHRIMAN – sekretar OV-a Ilijaš

Član 47. Statuta Općine Ilijaš glasi:

"Općinsko vijeće tajnim glasanjem vrši izbor predsjedavajućeg i zamjenika predsjedavajućeg iz reda izabraranih vijećnika, vodeći računa da predsjedavajući i općinski načelnik nisu iz istog konstitutivnog naroda ili reda ostalih, ako je Općinsko vijeće višenacionalnog sastava.

Kandidate za izbor predsjedavajućeg i zamjenika predsjedavajućeg mogu predložiti, svaki vijećnik ili grupa vijećnika.

U svrhu izbora predsjedavajućeg i zamjenika predsjedavajućeg mogu se obavljati konsultacije između predstavnika političkih subjekata koji imaju svoje članove u Općinskom vijeću.

Komisija za izbor i imenovanja podnosi izvještaj sa prijedlogom kandidata za izbor predsjedavajućeg i njegovog zamjenika, u vezi sa stavom 2. i 3. ovog člana.

ALAN ŠERAK – vijećnik SDP-a

Mislim da ne treba nikom tumačiti šta je pročitala. Svima nam je sve jasno. Ukoliko je Vijeće višenacionalne strukture, a jeste, mi onda trebamo napraviti prijedlog Odluke u skladu sa onim što nam Statut Općine Ilijaš nalaže. Mirsad Osmanović je u prijavi, kada je prihvatao kandidaturu za Općinsko vijeće, naveo da je Bosanac. Uvijek je bio Bosanac i uvijek se izjašnjavao da dolazi iz reda ostalih. Znam za Muhameda Handžića da se i on isto tako izjašnjava i on je iz reda ostalih. Za ove ostale ne znam. Dakle, ja evo apelujem i



ne znam više na koji način i šta da uradimo. Trebamo voditi računa šta ćemo sada uraditi. Dajte neka se ovi kandidati izjasne kome pripadaju. Da možda načelnik nije promijenio nacionalnost. Ne znam. Moguće je i to i onda ne bi smo imali spora. Međutim, poznavajući njega, znam da nije. Ja tražim da mi neko stvarno obrazloži kako ćemo izaći iz ove situacije i ništa više.

ALEN HASKOVIĆ – zamjenik predsjedavajućeg

Kolega, sami ste rekli da je vaš kandidat iz reda ostalih, izjasnio se kao Bosanac. Samim tim, njemu je omogućeno u skladu sa članom 47. Statuta Općine Ilijaš, da bude biran. Šta kazuje da Vijeće mora njega izabrati? Ne ulazim u to koga će Vijeće izabrati, ali omogućeno je svim vijećnicima da budu kandidati. Evo mogu i danas da se prijave da budu kandidati.

ALAN ŠERAK – vijećnik SDP-a

Je li ovaj prijedlog u skladu sa ovim članom? Je li nam danas ovaj prijedlog za predsjedavajućeg OV-a u skladu sa članom 47. Statuta Općine Ilijaš? Je li to mi sad kršimo i Statut? Dakle, je li nam prijedlog u skladu sa članom 47. Statuta Općine Ilijaš? To je pitanje na koje tražim odgovor.

ALEN HASKOVIĆ – zamjenik predsjedavajućeg

Mislim da jeste.

ALAN ŠERAK – vijećnik SDP-a

Ili misliš ili znaš da jeste? Nećemo se mi ovdje baviti nagađanjima. Dakle, moramo znati je li ili nije? Upravo u tom pravcu ja sam predlagao da mi povučemo ovu tačku sa dnevnog reda, da sve fino prođemo, da vidimo ko je, šta je, gdje, kud i kako i onda stvarno donesemo statutarnu Odluku koju trebamo da izglasamo. Nećemo valjda derogirati vlastiti Statut.

RASIM ŠEHIĆ – predsjednik Komisije za izbor i imenovanja

Ovaj član koji se odnosi konkretno na kolegu i nema dvojbe da se odnosi, ali isto tako Statut ni u jednom članu ne onemogućava ostalim vijećnicima kandidaturu za predsjedavajućeg. Tu je sva suština. Ovo što kolega govori o daljnjim posljedicama u to ne ulazimo. Ali znači, Statut omogućava bilo kom vijećniku da bude kandidat za predsjedavajućeg, tako i kolegi Mirsadu i u konsultacijama sa tijelima opštinskog organa nismo smatrali za shodno da treba da se ljudi izjasne po pitanju nacionalnosti, da je obaveza da nam to donesu na samu Komisiju.

MUHAMED HANDŽIĆ – vijećnik BPS-Sefer Halilović

Ja ne znam na koji način vi kolega Šehiću tumačite ovaj član 47. Statuta Općine Ilijaš ako je sekretar OV-a već pročitala sve. Nije problem, neka taj drugi kandidat bude biran, ali da ne bude izabran. Šta ako bude izabran? Je li to znači da ćemo imenovati kandidata iz reda Bošnjaka ili ovog koji nije prošao, a iz reda je ostalih. Treba li da rušimo podzakonske akte? Ja neću.

RASIM ŠEHIĆ – predsjednik Komisije za izbor i imenovanja

Na istom smo fonu. Ja samo kažem da ne trebamo onemogućiti kolegama. Zašto bih ja kolegi Mehi onemogućio da se kandiduje. Ovo što kažete hoće li biti izabran, a ko god bude izabran ja ću mu čestitati i ko bude obezbjedio većinu.

ALAN ŠERAK – vijećnik SDP-a (replika)

Da budemo kristalno jasni. Ne da mi nešto nekome onemogućujemo Ustav Federacije BiH mu onemogućuje. Valjda smo toliko shvatili kolega Šehiću. Ne ja, ne ti, ne peti ili deseti vijećnik, Ustav Federacije BiH je kazao da tako mora biti. Kao što je rečeno da iz reda RS ide jedan kandidat za srpskog člana predsjedništva, a iz reda Federacije BiH dva. To nije rekla Parlamentarna skupština, nego Ustav. Ustav Federacije BiH nam kaže jedno, a mi trebamo to primijeniti. Nemam ja ništa protiv vašeg kandidata, ni protiv kandidata iz LDS-a, niti SDP kandidata, ali ima ono što nas obavezuje, odredba Ustava. Sada je sekretar pročitala to i to je prepisano iz Ustava FBiH i mi to samo trebamo primijeniti. O tome se radi, a ne da ja nekoga onemogućujem. Ko god želi da vodi Vijeće, neka vodi i vidjet ćemo koliko je taj sposoban za to. Mislim da se sa ovim stvarima uistinu ne bi trebali igrati, ali vi kako hoćete.

MUHAMED HANDŽIĆ – vijećnik BPS-Sefer Halilović

Ne možemo mi tako "hoće li neko" i volja. Evo i meni je volja da budem predsjednik države, pa nisam. Znači ovdje je "mogu ja i niko više". Možemo mi tako pričati, ali postoje Zakonom propisana pravila kojih se trebamo pridržavati. Šehić je u jednom dijelu rekao da može biti biran ko god hoće. Mahir Dević, koji je bio predsjedavajući, bio je kandidat. Niko drugi nije smio da mu bude protukandidat. Ja sam znao da neću proći, jer sam imao 2-3 glasa, a Mahir sve ostale. Znao sam da neću proći. Da sam ja kojim slučajem bio izabran, morao bih podnijeti ostavku zato što je načelnik Bošnjak i ja Bošnjak. Evo sad, da se nije Meho i Mirsad kandidovali, ja bih se kandidovao. Ako budem izabran podnio bih ostavku, pa šta, neka bude neko slijedeći, da vidimo koliko idemo u tome, ali ne treba na silu ništa raditi. Da sam na mjestu ovih kandidata ja bih povukao svoju kandidaturu ili ako sam izabran podnio bih ostavku. Nemojte da idemo u krajnosti. Doći ćemo u situaciju da moramo podnositi apelaciju, da moramo doći do CIK-a da nam oni daju svoja mišljenja itd. Ima tu još koliko hoćete anomalija koje se provode kroz ovo Vijeće, a mi gledamo da to prođe kroz prste, jer nećemo radi kolega, radi harmonije koja vlada u Vijeću, međutim ide se duboko i narušavaju se propisi i zakonski akti. Prema tome, moramo povesti računa šta to mi radimo. Ako me bude pitali šta je ovaj moj komentar i to ću vam odgovoriti. Imate ovdje koliko god hoćete vijećnika koji su u sukobu interesa. Ja ću to tražiti na slijedećem OV-u i navest ću vam primjer. Neće me biti ni malo stid kada njih nije stid. Glasaju za nešto ovdje, a ne bi smjeli to raditi i onda ovdje nama "prosipaju" pamet. E neće moći.

ALAN ŠERAK – vijećnik SDP-a

Mi smo sada došli u ovu situaciju iz razloga jer sam sinoć na sjednici Komisije za izbor i imenovanja decidno govorio nemojte da to radimo. Pristigli su prijedlozi i ok. Mi smo morali smo izvršiti selekciju pristiglih prijedloga, morali da kažemo prijedlog taj i taj pripada ovom, onom ili ne znam kojem narodu, ne zadovoljava uslove, nije trebalo da prođe uopšte taj prijedlog. To se nije smjelo desiti. Za sva tri kandidata nismo imali njihovo nacionalno izjašnjenje. Povucite tačksu sa dnevnog reda. Dajte da stvari radimo na pravi način. Ništa

više. Nemojte da nešto radimo "mišićima". Evo rekle su kolege, ko želi tako raditi, nije problem, ali isto tako nisam džaba danas reagovao po pitanju usvajanja dnevnog reda. Ova tačka se morala povući, mi smo morali dobiti sve što nam treba da bi smo napravili prijedlog Odluke i u skladu s tim izaći pred Vijeće. Mi to nismo uradili i upravo ja govorio u tom kontekstu, povucite tačku, ali vi nećete. Imate zadatak da to danas "progurate". Pa dobro, krenite, nije problem. Dakle, kada dostavite prijedlog za koga treba glasati, ja tražim mišljenje Komisije za statut i propise.

ALEN HASKOVIĆ – zamjenik predsjedavajućeg

Sekretar vam je rekao kakva je procedura što se toga tiče.

ALAN ŠERAK – vijećnik SDP-a

Procedura je Komisija za statut propise daje svoja mišljenja na sve akte koji dolaze na Vijeće. To je procedura.

FAHIR HASANOVIĆ – vijećnik SDA

Želim nešto pitati, jer vidim da smo ušli u jedan problem, ali niko ovdje uopšte ne govori o kategoriji nacije. Ko određuje kategoriju nacije, šta je nacija i kada se izjašnjava i kada se može promijeniti izjašnjavanje? Da li se to može promijeniti? Ja sam Bošnjak i tako sam se izjasnio. E sada, koliko vidim ovdje, danas je neko Bošnjak, Hrvat, a moj otac je u vojnoj knjižici bio Srbin ili Hrvat, jer tako je tada moralo biti. Sada ja pitam vas jesmo li zašli u "ćorsokak"? Šta je kategorija nacije ovdje? Ko će mi to objasniti? Ovi koji su za ove prijedloge i ovi koji su protiv. Ja znam šta je nacija, ona definicija nacije, ali recite mi vi sada šta to branite ili šta to napadate?

ALAN ŠERAK – vijećnik SDP-a (replika)

Po pitanju nacionalnog opredjeljenja, to je lična stvar svakog pojedinca i to treba da znaš. Barem si trebao toliko pročitati do sada. Druga stvar, i ti si lično se potpisivao na prijavu i naveo koje si nacionalnosti. Taj dokument ti važi za ovaj mandat. Nema mijenjanja u toku mandata. Prema tome, trebate samo pribaviti te prijave i problem je riješen. Ništa više. Tvoj problem je kako ćeš se izjašnjavati, ja se izjašnjavam kao Bošnjak i ja ne mijenjam naciju da bih bio predsjedavajući OV-a, niti ću ikada promijeniti. Ja sam to što jesam. Nema tih para na svijetu zbog kojih bih ja rekao sad sam ovo, sad sam ono. Nadam se da sam bio jasan.

ALMIR ŠPIODIĆ – vijećnik BPS-Sefer Halilović

Postali smo taoci ove tačke dnevnog reda i očigledno imamo sukob sa zakonskim aktima koji ne prihvataju ovakve prijedloge i imamo, s jedne strane, ljude koji nam ukazuju na i to i s druge strane, očigledno ljude koji bi podržali to bez obzira što to nije u skladu sa propisima i Zakonima i Statutom. Ja bih volio, obzirom da nas ovdje ima 25, neki nisu prisutni, a svela se rasprava između trojice ljudi i predsjedavajućeg. Pretpostavljam da i ostale kolege imaju svoje mišljenje i lijepo bi bilo da to iznesu ovdje. Ja ne želim da glasam za nešto što me sutra može dovesti u pitanje da li sam glasao za ispravnu stvar, da li sam glasao za nešto što je u skladu sa Zakonom ili nije. Ne bih nikada podržao nešto što nije u skladu sa Zakonom. Volio bih da se i ostale kolege uključe, jer priča se svela na

dvojicu vijećnika koji nam ukazuju na nepravilnosti i jednog čovjeka-predsjednika Komisije, koji brani stavove. Kako izgleda nije uredu ni Poslovnik, možda ga je trebalo promijeniti prije, pa onda birati predsjedavajućeg OV-a, možda bi bilo više logike nego da neko mijenja nacionalnost da bi bio predsjedavajući OV-a.

AKIF FAZLIĆ – općinski načelnik

Potpuno razumijem ovu diskusiju, ali cijenim da mi moramo uvažavati život. Nažalost, neke stvari nismo pratili i nismo uredili. Nažalost i neke naše statutarne odredbe nisu u duhu Ustava koji su doživjeli donošenje amandmana. Tako i ova odredba koja je vezana za taj član koji reguliše nacionalnu strukturu načelnika i predsjedavajućeg OV-a. Ustav Kantona Sarajevo svojim amandmanom 37. je definisao potpuno precizno tu poziciju i Ustav Kantona Sarajevo je zadnja, po meni, zakonska pravna regulativa koja reguliše ovu oblast. Dakle, u tom amandmanu 37. Ustava Kantona Sarajevo stoji slijedeće: "Općinske vijećnike i općinskog načelnika biraju demokratskim putem birači na neposredni tajnim izborima na cijelom području općine na način utvrđen Zakonom. Općinski načelnik i predsjedavajući Općinskog vijeća u općinama ili Općinskim vijećima višenacionalnog sastava ne mogu biti iz istog reda konstitutivnog naroda, odnosno iz reda ostalih, izuzev u onim općinama u kojima jedan konstitutivni narod čini više od 80% stanovnika prema posljednjem popisu stanovnika u Bosni i Hercegovini. Konstitutivni narodi i pripadnici ostalih biće proporcionalno zastupljeni u općinskim organima vlasti. Takva zastupljenost će odražavati popis stanovništva 1991. godine do potpune provedbe Aneksa 7. u skladu sa članom 9. XI A Ustava Federacije BiH". Dakle, to su odredbe koje definiraju nacionalnu strukturu načelnika i predsjedavajućeg OV-a. Ovdje je vrlo precizno rečeno "po osnovu posljednjeg popisa", a taj popis je verificiran, objavljen i po tom popisu u Općini Ilijaš jedan konstitutivni narod čini gotovo 94% od ukupnog broja stanovnika. Pitanje dodatka u ovom članu koji se spominje da se popis iz 1991. godine tretira dok se ne provede Aneks 7. stoji ovdje, ali ljudi stoji i činjenica da od kako je donesen ovaj član, a donesen je davno, da provedba Aneksa 7. ide samo u drugom smjeru, a ne u onom što je on htio i da smo mi taoci ovoga člana do provedbe propisa Aneksa 7. Da je takva situacija, to je potvrdio i CIK koji je priznao popis iz 2013. godine i koji je opredjelio svojim odlukama implementaciju izbornih rezultata iz oktobra ove godine na bazi popisa iz 2013. godine. Dakle, govorim vam o jednoj situaciji koja, ako se zakačimo pravno nekog zareza, bliže je ovo što govori Alan i neke kolege. Međutim, ako govorimo zaista o životu, onda ovo su prevaziđene odrede i CIK je prepoznao u problemu implementacije izbora da više ovo se zaista mora riješiti i CIK je predložio i prihvatio popis stanovništva iz 2013. godine, donio Odluke da se po popisu iz 2013. godine implementiraju rezultati. Dakle, u tom duhu, mislim da previše pravimo dramu, ali to je da svaki vijećnik ocijeni kako se želi izjasniti. Ovdje, za mene je bitno da su svi vijećnici u poziciji da se mogu kandidirati, da nikome nije spriječeno demokratsko pravo da bude kandidiran i da bude biran i izabran, a Odluku je na Vijeću.

ALAN ŠERAK – vijećnik SDP-a (replika)

Ovo što nama načelnik sugeriše trenutno, što ste sada rekli ja sam frapiran uistinu. Imamo Ustav Federacije BiH i mi to nećemo poštovati. Ti predlažeš da ja kršim ustavne odredbe FBiH. Pa ne mogu da vjerujem. Stvarno ne mogu da vjerujem. Nisi u dosluhu sa svojim rukovodstvom stranke, koja jasno kaže "neka primjeni popis iz 1991. godine, jer je tako u Ustavu FBiH". To je tvoj predsjednik tako rekao. Međutim, sada vama to malo ne odgovara, pa će te promijeniti priču. Načelniče, Ustav je tu da se poštuje i poštovaće se. da se ne primjeni Aneks 7. ili dok se ne promjeni ta Ustavna odredba. Tako stvari stoje.

E sad, šta su naše želje, a šta su mogućnosti, to je nešto drugo. To šta vi zagovarate, to je klasična "fildžan" država. Dobro to znaš načelnice. Ako ćemo se za takvu državu boriti, ako ćemo to primijeniti što nam ti predlažeš, reci mi da pakujem stvari i da idem odavde, jer u takvoj državi ja neću da živim. Zamolit ću te ubuduće da ne savjetuješ svoje vijećnike da rade nešto što je protuzakonito.

AKIF FAZLIĆ – općinski načelnik (replika)

Dakle, ja sam citirao Ustav Kantona Sarajevo i uopšte nisam spomenuo Ustav FBiH da budemo tu potpuno jasni. Potpuno sam precizno rekao da svaki vijećnik ima pravo da bude kandidat i potpuno sam precizno rekao da ovo Vijeće se može opredjeliti iz predloženih kandidata koje je ova Komisija utvrdila. Dakle, odluka je na Vijeću. Zašto se CIK odlučio za ovo? Odlučio se da riješi neke stvari, jer ne možemo više biti taoci nečega što ne postoji. I nama život nameće da rješavamo životne stvari, naravno uklapajući ono što jesu propisi. Svjesni smo da je utvrđen popis, javno objavljen i prihvaćen. Svjesni smo Odluka CIK-a. Dakle, to već govori o nečemu da se Vijeće može izjašnjavati u duhu prijedloga koje ste dobili od strane Komisije za izbor i imenovanja, a naravno vi ćete se opredjeliti za kandidata za koji mislite da ispunjava uvjete.

ALMIR ŠPIODIĆ – vijećnik BPS-Sefer Halilović

Predsjedavajući, ja bih vas zamolio da vi vodite sjednicu svojim tokom. Ovakvom diskusijom i raspravom ostat ćemo do večeras. Ako se nastavi ponovo ovo repliciranje i javljanje, ja predlažem da se ova sjednica prekine i da nastavimo sutra. Da malo "ohladimo" glave, da sutra ponovo pričamo, možda ćemo biti pametniji ili po ustaljenoj proceduri, formirajte komisiju, pa neka vijećnici glasaju. Ako ne bude po Ustavu, prijavimo CIK-u. Vijećnici neka glasaju onako kako misle da je ispravno i onda ćemo rješavati dalje. Postoji Ustavni sud, pa možete i na njemu rješavati da li je neko glasao ispravno ili pogrešno. Nemojte da ostajemo više na ovome, tri sata raspravljamo o jednoj tački dnevnog reda.

ALAN ŠERAK – vijećnik SDP-a

Kolega Špiodiću, ja sve vrijeme pokušavam da svima nama objasnim da mi ne trebamo ići u nešto, a znamo unaprijed da to nije ustavno. Stvarno više ne znam na koji način da to uradim. Je li treba sada pustiti da "srljamo" u nešto, a znamo da je to osuđeno na propast. Trebamo li to uraditi? Valjda smo toliko odgovorni da to nećemo dozvoliti. Ja se nadam da smo svi toliko razumni da nećemo dozvoliti da uradimo nešto što će kasnije proizvesti određene pravne posljedice. Prije svega, moramo biti odgovorni prema ovom organu tj. prema Općini Ilijaš. Jesmo li prekršili procedure? Jesmo, milion njih. Da me se sinoć slušalo na Komisiji ono što sam govorio, vjerovatno ne bi smo danas došli do ovoga. Mi smo na Komisiji, to je to radno tijelo koje je trebalo da uradi tu stvar, da se mi danas na Vijeću ne zamaramo. Komisija je to trebala uraditi kolega Špiodiću, a nije uradila. Zašto? Zato što su došli pripremljeni, htjeli da izvedu izrežiranu sjednicu Komisije, pa im to nije baš dobro polazilo za rukom itd. To je sinoć bilo, a ja sve na bazi argumenata postavljao pitanja. Trebali smo imati izjave svakog kandidata posebno. Nismo imali. Zašto? Zato što je zakazao predsjednik Komisije. Morao se postarati da mi to sinoć imamo, pa da vidimo. "Hoće taj da bude predsjedavajući, dolaziš iz reda tog i tog naroda, prijatelju izvinjavam se, ali ti to ne možeš biti zato što ti to onemogućuje Ustav". Onda bi smo imali par imena koji zadovoljavaju sve kriterije i onda bi se izjašnjavali između tih imena. Takva je procedura

morala biti, ali ne. "Mi dobili zadatak u utorak na vašoj sjednici, biće taj i taj predsjedavajući i hajdemo ga izgurati silom". Ne može to tako. Tako se država ne vodi.

ALMIR ŠPIODIĆ – vijećnik BPS-Sefer Halilović (replika)

Ukazali ste na nepravilnosti i da sa ovim potezom mi kršimo Ustav FBiH. Ali, ako ljudi stave tačku na glasanje i ja glasam protiv, znači, pošto vi to fino tumačite da se ja nisam ogriješio o Zakon. Ako već žele da glasaju, ne znam šta je rješenje? Da gledamo jedni u druge do večeras, do Nove Godine.

MUHAMED HANDŽIĆ – vijećnik BPS-Sefer Halilović

Neka ostanu gospoda sa "apetitima" neka provedu ovu tačku, ali ja neću da učestvujem uopšte u ovim izborima. Izaći ću vani i neću biti dio toga dok se ne završi ova procedura. Što se mene tiče, oni neka to urade, a rekao sam da ću biti na čelu tog tima koji će voditi procese do kraja i dok se ne završi i dok se ne kaže je li ustavno ili nije i možete me svi zvati i svi koga imate, ali nikada neću promijeniti mišljenje. Sada se izvlače, da ja nađem Zakon koji definiše ovo za sat vremena, ne mogu. Imamo ovdje pravника koji se bave time, pa i oni ne mogu i neću time da se bavim.

ALAN ŠERAK – vijećnik SDP-a (replika Almiru Špiodiću)

Razumijem šta želite da kažete, međutim, najbolja varijanta je bila da danas ove tačke dnevnog reda nam. Ne znam šta vam se toliko žuri? Stvarno mi niste jasni. Dakle, da danas ne raspravljamo o tome, da uradimo to kako Zakon nalaže, da to vratimo u zakonske okvire i onda na slijedećoj sjednici izglasamo tog nekog ko već treba da bude predsjedavajući. Ništa drugo ja ne tražim. I ne znam šta je toliko problem povući ovu tačku sa dnevnog reda i staviti je idući mjesec na dnevni red, a do tada sve izvesti ovo što treba da se uradi i onda da pristupimo i svi izglasamo tu "priču". Evo ja ću prvi glasati ukoliko bude u skladu sa Ustavom. Poštujući većinu ja ću prvi glasati za tu osobu. Ne možemo kršiti zakonske odredbe samo zato što nekome "čeif" da to tako bude.

ALEN HASKOVIĆ – zamjenik predsjedavajućeg

Ne mogu da shvatim kako na prošloj sjednici Vijeća kada smo imali Odluku o razrješenju predsjedavajućeg Općinskog vijeća, kolega iz vašeg Kluba i kolega Muhamed Handžić su insistirali da bude tačka dnevnog reda imenovanje predsjedavajućeg Općinskog vijeća, a danas pravimo toliku priču oko toga, oko procedura i oko povlačenja te tačke sa dnevnog reda. Napravimo sve da ta tačka danas bude na dnevno redu i sada imamo problem zbog toga. Ne vidim kako ste mislili procedure provesti na prošlom dnevnom redu, na 25.sjednici Vijeća?

ALAN ŠERAK – vijećnik SDP-a (replika)

Dakle, nisam bio na prošloj sjednici Vijeća, pa ne znam šta se tu dešavalo. Međutim ako su kolege tražile tačku dnevnog reda, po meni nije bilo ništa sporno da se na toj sjednici kaže da iduće Vijeće idemo u ovu priču koju danas imamo, ali smo do tada morali ovo provesti kako smo trebali provesti. Teško je sada tražiti da se uvrsti tačka dnevnog reda na sjednicu, iako je i to moguće, uzima nam malo vremena, ali su se sve procedure mogle ispoštovati. Isti dan da je uvrstimo, napravimo pauzu, da sjedemo, odradimo sve što treba

da se odradi i onda dođemo pripremljeni na tu tačku dnevnog reda. Moglo se i to izvesti. Međutim, vi ste krenulu u nekakvu priču ovdje, preskačete korake i ne znate kako se izvući iz ove situacije. Po meni “srljate” i napravili ste određeni raskorak i ne možete se vratiti u rikverc. I dalje tvrdim da nemam prijedlog na stolu, ne znam za što trebam glasati. Ja ga nemam. Neka mi neko kaže za šta ćemo mi danas glasati. Ja prijedlog imena nemam na stolu. Treba da obrazujemo Komisiju koja će provesti izbore. Pa pod kojom tačkom dnevnog reda? Šta piše pod tačkom 3? Piše:”Prijedlog Odluke o izboru predsjedavajućeg Općinskog vijeća Ilijaš”. Znači ja samo treba da glasam za prijedlog Odluke i ništa više. Odluke nema. Ja je nemam, ni vi je nemate i niko od prisutnih vijećnika je nema. Odluka ne postoji.

MUHAMED HANDŽIĆ – vijećnik BPS-Sefer Halilović

Predsjedavajući, tebi moram dati jedan odgovor, jer si me maloprije pomenuo. Bilo bi dobro da to ostane tako kako ti kažeš. Jesam ja tražio da bude izbor predsjedavajućeg prošlu sjednicu Vijeća i to je trebalo biti na prošloj sjednici Vijeća. Prošlo bi možda bezbolnije i lakše, da je bilo na prošloj sjednici. A kako pripremiti? Vi kažete koji je model da se to pripremi? To je jednostavna stvar ako Komisija radi svoj posao, ako vi insistirate da Komisija radi ono što treba da radi oni su mogli donijeti prijedlog Odluke, a Odluka Alane postaje kada je izglasaju vijećnici. Međutim, vi to niste pripremili za prošlu sjednicu Vijeća, a sada pogotovo niste pripremili kako treba, a imali ste mjesec dana. Drugo, član 47. Statuta Općine Ilijaš vi niste ni pogledali, niste obraćali pažnju na njega niti ste htjeli to da radite. Tamo vam fino piše da uz konsultacije sa svim političkim subjektima koji participiraju u vlasti, ali mi ne postojimo. Nas osam ne postoji. Za vas postoji samo djelimično SDP-e zato što imaju Klub i niko više ne postoji, jer ćete vi njih preglasati i šta god vi predložite to prolazi, a ako mi nešto predložimo kažete “šta se vi pitate”, mi imamo “ruke”. Izvolite, donesite odluke kakve god hoćete, jer ste vi i do sada donosili. Vjerujte da će vas koštati mnoge odluke. Ući ćemo u suštinu problema i ne ide to tako lako kako se misli ovdje. Ovdje ide vrlo teško ali se prikriva i pokrenut ćemo procese vjerujte. Izvolite kandidujte, izvolite izaberite koga god vi hoćete, ne mora biti ni vijećnik, jer vi sve možete.

RASIM ŠEHIĆ – predsjednik Komisije za izbor i imenovanja

Prije pauze smo imali u Izvještaju koji sam podnio moje zvanično saopštenje, odnosno u sklopu tog Izvještaja gdje sam ja dao imena. Znači, na osnovu člana 20. Poslovnika Općinskog vijeća Ilijaš, a u vezi sa Ustavom, Zakonom i Statutom Općine Ilijaš Komisija za izbor i imenovanja konstatuje da su se stekli uslovi za izbor predsjedavajućeg Općinskog vijeća Ilijaš što sam ja i konstatovao. Znači, kako je utvrđeno članom 21. Poslovnika OV-a Ilijaš izbor predsjedavajućeg OV-a Ilijaš se vrši tajnim glasanjem iz reda izabranih vijećnika, a sve u skladu sa Statutom Općine Ilijaš i odredbama Poslovnika. Znači, Komisija za izbor i imenovanja, kao što sam konstatovao prije pauze, predlaže da se pristupi glasanju, informiše da su kandidati za predsjedavajućeg OV-a Ilijaš abecedno kako to Poslovnik nalaže:

1. Meho Džindo
2. Alma Omerović i
3. Mirsad Osmanović

ALAN ŠERAK – vijećnik SDP-a (replika)

Evo ja opet postavljam pitanje predsjedniku Komisije za izbor i imenovanja da li su ti ta

imena u skladu sa Statutom Općine Ilijaš?

RASIM ŠEHIĆ – predsjednik Komisije za izbor i imenovanja

Jesu. Statutom Općine Ilijaš omogućava svakom vijećniku da bira i da bude biran. Valjda se i vi zalažete za elementarno pravo, za makar priliku da neko bira i da bude biran. Ne mogu da shvatim suštinu pitanja, da neko što je Bošnjak nema priliku ni da bude biran. Komisija nije ni nadležna da nekome ospori nešto. Komisija je radno tijelo koje može da razmatra, zaprimi materijal, konstatuje jesu li ispravne tehničke stvari i mi ovdje samo podnosimo izvještaj kolega Alane. Kako mi možemo nešto, kao radno tijelo, čije odluke nisu obavezujuće? U članu 45. Statuta Općine Ilijaš OV-e piše da se OV-e brine o ustavnosti odluka koje donosi.

Razumijem vas u dijelu kada govorite o Ustavu i šta može proizvesti. Imamo različita tumačenja. Imamo jednu stranu koja tumači jedno i drugu stranu koja tumači drugo.

Komisija po Statutu, nema pravo na to.

ALAN ŠERAK – vijećnik SDP-a (replika)

Kolega, prvo ste trebali pročitati Poslovnik i vidjeti za šta Općinsko vijeće obrazuje stalna radna tijela. To su stručna radna tijela koja treba da se bave proceduralnim, zakonskim stvarima itd. U startu gore imaš navedeno za šta se obrazuje, za šta si ti, za šta postoji tvoja Komisija, a dole ti je pojašnjeno čime ćeš se ti baviti. To si trebao pročitati i to sam ti sinoć rekao i evo opet istu grešku praviš. Opet da ti kažem, Komisija je morala uraditi ovaj prijedlog u skladu sa svim relevantnim činjenicama. Mi to nismo sinoć uradili. Ja sam rekao da nemamo niti za jednog kandidata izjavu kako se ko izjašnjava. Da smo to imali, danas ne bi imali ove probleme, jer bi na Komisiji rekli evo uredu je. Ne onemogućava to vijećnik ili Vijeće, nego onemogućavaju akti koji su u Federaciji BiH. Neko ih je napisao i tako stvari poredao. Nismo to ja i ti uradili, ali ja i ti to trebamo primijeniti. E o tome se radi. Ali ako vi želite ovo da izglasate, onda izglasajte.

MUHAMED HANDŽIĆ – vijećnik BPS-Sefer Halilović

Tendencioznu odluku ste donijeli, a kažeš svakome se dozvoljava da bira i da bude izabran, d donijeli ste odluku da ne bude ni biran ni izabran lično radi mene, radi Besima Gljive, Selvera Herića. To je jedan od osnovnih primjera na koje ste se vi tako lijepo smijali. Vi ste se "ubili" od smijanja što je ta odluka donesena većinom glasova da ne bi mi bili birani u savjete mjesnih zajednica. To je jedno od ljudskih prava koje ste vi donijeli, za koje se vi zalažete.

HALID DIZDAREVIĆ – vijećnik SDA

Tražim puazu od pet minuta.

Pauza od 14:25-14:40h

Nakon pauze za riječ se javio Rasim Šehić.

RASIM ŠEHIĆ – predsjednik Komisije za izbor i imenovanja

Obzirom da nam se toliko ne žuri, a uvažavajući i diskusiju po pitanju nacionalnog konsenzusa ovu tačku dnevnog reda povlačim. Znači, sa zadatkom da općinska tijela koja su nadležna po ovom pitanju provjere da li se u skladu sa Zakonom o zaštiti ličnih



podataka, može tražiti izjašnjenje kandidata. Neću reći za narednu sjednicu, ali da zadužimo Općinsko vijeće da to uradi na jednoj od narednih sjednica.

ALEN HASKOVIĆ – zamjenik predsjedavajućeg

Konstatovao je da je tačka Prijedlog Odluke o izboru predsjedavajućeg Općinskog vijeća Ilijaš povučena sa dnevnog reda.

AD-4

Prijedlog Programa rada Općinskog vijeća Ilijaš za 2019. godinu

Diskutanata po ovoj tački dnevnog reda nije bilo, pa je OV-e jednoglasno usvojilo

Programa rada Općinskog vijeća Ilijaš za 2019. godinu

AD-5

Prijedlog Budžeta općine Ilijaš za 2019. godinu

AKIF FAZLIĆ – općinski načelnik

Na Nacrtu smo dali jako dobru podršku, a kroz javnu raspravu je zaista došlo mnogo kvalitetnih prijedloga i onih koji nisu direktno i eksplicitno vezani za operativni plan za 2019. godinu našli su se u ovom prijedlogu, a većina tih zahtjeva koja je došla kroz javnu raspravu odnosi se upravo na podjelu ovako definiranih Budžetskih stavki u onoj infrastrukturi, prije svega saobraćajnoj, komunalnoj, javnoj rasvjeti, ono što prije svega interesuje mjesne zajednice. Javna rasprava će nama puno pomoći u sastavljanju prijedloga Operativnog plana koji će biti u februaru na dnevnom redu. Vidjeli ste u prijedlogu Budžeta da je on značajno povećan u odnosu na Nacrt i da je predložen u iznosu od 17.700.000,00 KM. Dakle, nešto više od dva miliona u odnosu na Nacrt Budžeta. Ovaj zadnji mjesec dana iskoristili smo za dodatnim aktivnostima, do juče aktuelnom Vladom Kantona Sarajevo, vezano za određene transfere i definisane kapitalne projekte na području Općine Ilijaš da obezbjedimo sredstva i naravno dijelom povećanja naših izvornih vlastitih sredstava. Dakle, u strukturi ovog prihoda i primitaka od 17.700.000,00 KM mogli ste vidjeti da u idućoj godini trebamo prikupiti 12.530.000,00 KM kao tekući priliv i mislim da fiskalni kapacitet ove općine omogućava da je ovo realna stavka da taj tekući priliv dostignemo u iznosu kako je projektovan u ovom prijedlogu, da je prenos sredstava 3.970.000,00 KM i to je pozicija koja je već praktično obezbjeđena i da je kreditno zaduženje od 1.200.000,00 KM za koje ćemo pokrenuti procedure po usvajanju ovog Budžeta i definisali smo ga za finansiranje izgradnje gradskog stadiona. Kada je u pitanju tekući prili, ono što raduje jeste stalni rast poreznih prihoda 5.647.000,00 KM, prihod od indirektnih poreza, direktnih poreza, poreza na dohodak, neporezni prihodi 2.809.000,00 KM i to je nešto manje u odnosu na Budžet iz ove godine i kapitalni tekući i drugi transferi od ostalih nivoa vlasti 4.073.000,00 KM od čega 2.045.000,00 KM kapitalni grantovi od Kantona Sarajevo. Nadamo se da ćemo sa novoizabranom Vladom Kantona Sarajevo uspjeti definirati ove projekte i obezbjeđiti njihovo finansiranje kroz Budžet Kantona Sarajevo onako kako smo definisali u ovom Prijedlogu Budžeta. Ovakva sredstva su raspoređena onako kako ste vidjeli u Nacrtu i samo ću malo značajna odstupanja istaći. Željeli smo da zadovoljimo veliki broj onih koji su sugerisali da povećamo sredstva za tekuće transfere, a prije svega tu mislim na transfer kada su u pitanju izdaci za sportska društva – povećano je 15.000,00 KM, aplikacije programa za NVO 13.000,00 KM, povećanje za stipendije 10.000,00 KM, kulturna i sportska društva 8.000,00 KM. Dakle,

nekih novih 50.000 KM za aktivnosti iz svere društvenog života kroz tekuće grantove iz ovog prijedloga Budžeta. Ono što je značajno povuklo povećanje ovog prijedloga Budžeta jesu kapitalni projekti i o njima govorimo stalno. Dakle, to su ovi višegodišnji projekti, projektovani u najmanje dvije godine kao faze i jedan od tih projekata jeste vodovodni sistem Vrutak, u odnosu na Nacrt povećanje 650.000,00 KM. U decembru smo obezbijedili dodatnih 500.000,00 KM sa Kantom Sarajevo, taložnica 200.000,00 KM, dakle obezbjedili smo dodatnih 80.000,00 KM u odnosu na Nacrt, bilo je 120.000,00 KM, izgradnja ove vodovodne i komunalne infrastrukture nova pozicija 350.000,00 KM je pozicionirano, a radi se o jednom velikom primarnom vodovodu i primarnom kanizacionom sistemu koji je vezan za tri Regulaciona plana u Sovrlama koji generalno treba da bude sistem gradske vodovodne i kanizacione mreže i služi cijelom ovom području na kojem se on gradi. Ovdje smo dodali izgradnju autobuskih nadstrešnica na području Srednjeg (četiri nadstrešnice) kako je to bilo po zahtjevu i Osnovne škole "Srednje" i mjesnih zajednica sa tog područja, povećali smo sredstva za objekte škola sa 50.000,00 KM na 80.000,00 KM. Dakle, osnovni prioriteti u ovoj oblasti jeste Područna škola Gajevi i objekat Osnovne škole u Podlugovima. Gradski stadion, dobili smo transfer od Vlade Kantona Sarajevo, povećanje za 200.000,00 KM. Dalje, ove male cifre neću komentarisati. Pitanje nabavke zemljišta u odnosu na Nacrt Budžeta ponovo smo oko nabavke zemljišta za proširenje nogometnog igrališta u Mjesnoj zajednici Ljubnići skinuli, jer još uvijek nemamo riješene imovinsko-pravne odnose, ali smo zato povećali nabavku zemljišta za društvenu infrastrukturu i taj prijedlog Odluke imate na današnjoj sjednici Općinskog vijeća na 330.000,00 KM i želimo da tom Odlukom to zemljište konačno kupimo i dugoročno obezbjedimo prostor na kome će se graditi društvena i sportska infrastruktura na ovoj mjesnoj zajednici. Takođe značajno povećanje na poziciji puteva i putne infrastrukture za nekih 452.000,00 KM u odnosu na Nacrt, a i ono je proizašlo jer smo uspjeli obezbjediti od Kantona Sarajevo dodatnih 300.000,00 KM i definisali neka vlastita sredstva za ovu oblast. U konačnici ovo su neke osnovne stvari koje jesu vezane ili izmjenjene u odnosu na Nacrt Budžeta koji ste dobili.

Dakle, kroz svoje početno izlaganje pokušao sam vam približiti da cijenimo da je ovaj Budžet zaista jako realan i on korespondira sa utvrđenom našom Strategijom razvoja Općine Ilijaš 2018.-2022.godina, korespondira sa Operativnim planom i Budžetom iz ove godine u smislu nastavka projekata koje smo započeli i definisanjem novim projektima, a kako znate mi smo njih i kroz Nacrt definisali i nije bilo primjedbi na tako utvrđene prioritete. Nismo imali amandmana na ovaj prijedlog Budžeta tako da cijenim da su vijećnici u ovom Vijeću, u osnovi, zadovoljni ovim prijedlogom Budžeta i zaista očekujem podršku ovakvom dokumentu.

**MUHAMED HANDŽIĆ – vijećnik BPS-Sefer Halililović**

U odnosu na Nacrt Budžeta ne bi se imalo šta posebno reći. Međutim, korektno je da malo prokomentarišemo Budžet obzirom da se radi o višemilionskom Budžetu. Dakle, ovo je više nego korektan prijedlog Budžeta od 17.700.000,00 KM. U Nacrtu je to bilo 15.600.000,00 KM i nismo izgleda dobro procijenili priliv sredstava iz nekih transfera, a vjerovatno se radi o dotacijama za korištenje zemljišta i suficit iz protekle godine koji ovako indikativan iznosi cca 4 miliona. Ako je Budžet bio 19 miliona u prošloj godini, onda je realizovano 15 miliona i to je otprilike nešto manje od 75% tako da bi se trebali pozabaviti tim. Moja sugestija načelnice, pored vašeg Operativnog plana, koji će ne sumnjam biti kvalitetan i dobro pripremljen, da pripremite jedan operativni tim koji će pratiti sve ove projekte koje ste planirali za narednu godinu, pratiti tok njegove realizacije i u kojem su stepenu tako da se ne bi desilo da slijedeće godine imamo suficita 25% ili 30%

postojećeg Budžeta. To je jedna opaska koju možete ako hoćete prihvatiti da pored vašeg Operativnog plana ima jedan operativni tim koji će pratiti Budžet i izvještavati vas na vrijeme kako bi vi mogli intervenisati. Naravno, 19 miliona nije lako utrošiti domaćinski u sve ono što treba, nije lako ni izgraditi, ali nije lako ni sakupiti 19 miliona. Nemam zamjerki na neke stavke koje je načelnik odlično rasporedio izuzev što me malo u početku zabrinjavalo kapitalni transferi. Nešto su smanjeni skoro za 50%, ali ne vidim šta bi mi to još pored ovoga mogli raditi kada smo dosta toga već uradili. Što se tiče Kluba vijećnika BPS-Sefer Halilović imate podršku ovom Budžetu. Hvala vam i čestitam na istom.

ALAN ŠERAK – vijećnik SDP-a

Neću previše o strukturi Budžeta. Nadam se da ćemo ovo zacrtano uspjeti i realizovati u narednoj godini. Samo ću apelirati na vas da moramo malo užurbano raditi obzirom da je Nacrt u javnoj raspravi, a tiče se Budžeta Kantona Sarajevo i on je skraćen na 15 dana i ja očekujem saradnju sa vama načelniče. Mi radimo amandmane kako bi se uspjele ove stvari realizovati i ja sam prije svega ilijašanin, a ne neko ko je protiv ovog grada. Znači, nema politikanstva ovdje.

HALID DIZDAREVIĆ – vijećnik SDA

Čestitke kolegama na konstruktivnoj diskusiji. Budžet je za sve građane Općine Ilijaš i jako je dobar, te sam siguran da će i Operativni plan, kao što kaže kolega Handžić, sve ovo pratiti i da se sve može realizovati.

EDHEM HASANOVIĆ – vijećnik GS-a

Šta reći na Budžet od ovoliko miliona. Posebno se moram zahvaliti načelniku na kupovini zemljišta u Podlugovima od 7 dunuma i 740 m<sup>2</sup> za koje je izdvojeno 334.000.00 KM. To znači da su i Podlugovi došli na red da se nešto uradi, da se napravi sportska ploha i sve što ide uz nju. Još jednom se zahvaljujem i imate podršku GS-a na Budžet.

Diskutanata po ovoj tački dnevnog reda više nije bilo, pa je zamjenik predsjedavajućeg dao na glasanje ovu tačku dnevnog reda.

ALAN ŠERAK – vijećnik SDP-a

Izrazio je sumnju u glasanje i zatraženo je pojedinačno glasanje.

ZA su glasali slijedeći vijećnici: Šeherzada Ćosić, Anel Bumbulović, Vehid Halilović, Alma Omerović, Mehmed Sinanović, Adem Alić, Fahir Hasanović, Mirza Bektić, Semir Dedić, Halid Dizdarević, Rasim Šehić, Melisa Matoruga, Alen Hasković, Sead Šehić, Muhamed Handžić, Almir Špiodić, Edhem Hasanović i Meho Džindo.

SUZDRŽANI su bili slijedeći vijećnici: Alan Šerak i Eldar Šehić.

ODSUTNI vijećnici: Mirsad Osmanović, Akif Bešlija, Asim Mujić, Semir Dizdarević i Besim Gljiva.

ALAN ŠERAK – vijećnik SDP-a (poslovnička intervencija)

Za vijećnike koji nisu prisutni, molim da uzmete daljinske upravljače, da se neko drugi umjesto njih ne bi izjašnjavao. Kolega Akif Bešlija nije prisutan, a neko je glasao za njega.

SEAD ŠEHIĆ – vijećnik SDA

Izvinjavam se, ja sam pogriješio.

ALAN ŠERAK – vijećnik SDP-a

Dakle, ne možemo imati glas Akifa kojeg ovdje nema i ubuduće ove stvari se ne smiju dešavati.

Konstatovano je da je Općinsko vijeće sa 18 glasova ZA i 2 UZDRAŽANA donijelo

Budžet općine Ilijaš za 2019. godinu

AD-6

Prijedlog Odluke o izvršavanju Budžeta općine Ilijaš za 2019. godinu

Diskutanata po ovoj tački dnevnog reda nije bilo, pa je zamjenik predsjedavajućeg dao na glasanje ovu tačku dnevnog reda.

ALAN ŠERAK – vijećnik SDP-a

Izrazio je sumnju u glasanje i zatraženo je pojedinačno glasanje.

ZA su glasali slijedeći vijećnici: Šeherzada Ćosić, Anel Bumbulović, Vehid Halilović, Alma Omerović, Mehmed Sinanović, Adem Alić, Fahir Hasanović, Mirza Bektić, Semir Dedić, Halid Dizdarević, Rasim Šehić, Melisa Matoruga, Alen Hasković, Sead Šehić, Muhamed Handžić, Almir Špiodić, Edhem Hasanović i Meho Džindo.

SUZDRŽANI su bili slijedeći vijećnici: Alan Šerak i Eldar Šehić.

ODSUTNI vijećnici: Mirsad Osmanović, Akif Bešlija, Asim Mujić, Semir Dizdarević i Besim Gljiva.

Konstatovano je da je Općinsko vijeće sa 18 glasova ZA i 2 UZDRAŽANA donijelo

Odluku o izvršavanju Budžeta općine Ilijaš za 2019. godinu

AD-7

Prijedlog Odluke o pristupanju izradi Izmjena i dopuna Regulacionog plana "Željezara"  
Ilijaš – izgradnja objekta za izradu lakih metalnih konstrukcija

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o pristupanju izradi Izmjena i dopuna Regulacionog plana "Željezara" Ilijaš –  
izgradnja objekta za izradu lakih metalnih konstrukcija

AD-8

Prijedlog Odluke o davanju mišljenja na Godišnji plan realizacije šumskoprivredne osnove

NAMKA ŠUVALIJA – predstavnica "Sarajevošuma"

Ovdje se radi o davanju mišljenja na Godišnji plan realizacije šumskoprivredne osnove Gornjebosansko i Bistričko. To je redovna procedura gdje mi dostavljamo ove godišnje planove Kantonalnoj Upravi za šumarstvo, a ono u proceduru dostavlja opštinama na davanje mišljenja. Davanje mišljenja se vrši svake godine. Mi imamo usvojenu šumskoprivrednu osnovu za ova dva područja. Šumskoprivredna osnova se usvaja za period od deset godina, a godišnji plan realizacije šumskoprivredne osnove predstavlja jednu desetinu tog plana. Ja mogu vama iznositi šta smo i koliko planirali, a vi ste dobili u materijalu koliko je planirano i da vas ne bi zadržavala, ako postoji neko pitanja, na raspolaganju sam da odgovorim.

ALAN ŠERAK – vijećnik SDP-a

Prije svega, dugujem vam izvinjenje. Uбудuće ću vama predsjedavajući sugerisati, kada imamo nekoga ko dolazi iz vana i treba da se obrati Vijeću, te tačke treba da planiramo kao prve. Još jednom se izvinjavam što ste ovoliko morali čekati da dođete na red da kažete što ste imali reći.

NAMKA ŠUVALIJA – predstavnica "Sarajevošuma"

I ubuduće ćemo se odazvati pozivu i zahvaljujemo se na saradnji.

Diskutanta po ovoj tački dnevnog reda više nije bilo, pa je Općinsko vijeće jednoglasno donijelo

Odluku o davanju mišljenja na Godišnji plan realizacije šumskoprivredne osnove

AD-9

Prijedlog Odluke o ustupanju na korištenje infrastrukturnih objekata: Antenski stub i kućica  
na lokaciji Karašnica, Javnoj ustanovi "Kulturno-sportski centar i Radio Ilijaš"

SANJA ZAGORAC-JOZIĆ – pomoćnica načelnika

Prije pet godina Općinsko vijeće je donijelo istu ovakvu Odluku koja ističe 31.12.2018.godine. Cijeneći da je je JU "Kulturno-sportski centar i Radio Ilijaš" u prethodnih pet godina se prema ovim infrastrukturnim objektima odnosila kao dobar domaćin, da je korištenje ovog stuba doprinijelo ekonomsko konsolidaciji ove javne ustanove, predlagatelj je odlučio da ovo pravo – ustupanje na korištenje, produži i za narednih pet godina. Zatražili smo mišljenje Pravobranilaštva Kantona Sarajevo koje je dalo pozitivno mišljenje i koje imate u sklopu ovog materijala. Dužna sam napomenuti da sastavni dio ove Odluke čine i kriteriji za određivanje cijene zakupa na infrastrukturnim objektima. Cijena se nije mijenjala u odnosu na period od prethodnih pet godina. Komisija za statut i propise dala je pozitivno mišljenje. Ovom Odlukom da je pravo JU "Kulturno-

sportski centar i Radio Ilijaš" da, uz prethodno pribaljenu suglasnost Općine Ilijaš, može infrastrukturne objekte dati pod zakup i ugovoriti uslove i način zakupa. Predlažem Općinskom vijeću da ovu Odluku usvoji u predloženom tekstu.

Diskutanata po ovoj tački dnevnog reda više nije bilo, pa je Općinsko vijeće jednoglasno donijelo

Odluku o ustupanju na korištenje infrastrukturnih objekata: Antenski stub i kućica na lokaciji Karašnica, Javnoj ustanovi "Kulturno-sportski centar i Radio Ilijaš"

#### AD-10

Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br.325/3)

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o neposrednoj pogodbi za prodaju neizgrađenog građevinskog zemljišta (k.č.br.325/3)

#### AD-11

Prijedlog Odluke o kupovini nekretnina (k.č.br.2405/2)

ALEN HASKOVIĆ – zamjenik predsjedavajućeg

Na ovu tačku dnevnog reda predlagač je uložio amandman koji je sastavni dio ove Odluke.

Amandman glasi:"U članu 2. Prijedloga Odluke o kupovini nekretnina kojim je utvrđeno da se predmetna kupovina vrši za potrebe izgradnje sportsko – rekreacionog centra u Mjesnoj zajednici Podlugovi, mijenja se i potrebno je dodati "za potrebu izgradnje društvene i sportske infrastrukture u Mjesnoj zajednici Podlugovi".

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o kupovini nekretnina (k.č.br.2405/2)

#### AD-12

Prijedlog Odluke o povjeravanju vršenja poslova Pravobranilaštva Kantona Sarajevo za 2019. godinu

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o povjeravanju vršenja poslova Pravobranilaštva Kantona Sarajevo za 2019. godinu

AD-13

Informacija Službe civilne zaštite o protivminskim akcijama i mjerama zaštite i spašavanja  
za 2018. godinu

Diskutanata po ovoj tački dnevnog reda nije bilo, pa je Općinsko vijeće primilo k znanju

Informaciju Službe civilne zaštite o protivminskim akcijama i mjerama zaštite i spašavanja  
za 2018. godinu

Nakon što je iscrpljen dnevni red, zamjenik predsjedavajućeg Alen Hasković zaključio je  
dvadesetšestu sjednicu OV-a Ilijaš u 15:15h.

Zapisničar:  
Maida Habibović

ZAMJENIK PREDSJEDAVAJUĆEG  
OPĆINSKOG VIJEĆA ILIJAŠ

---

Alen Hasković, MA šum.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
certifikat:CRO20063Q

